

75237.58/1310

39

HARVARD COLLEGE LIBRARY
FROM THE
HARVARD - YENCHING
INSTITUTE
MAR 1 1932

御選元詩卷第十目錄
樂府歌行九
王逢十六首
戴良四首
顧瑛九首
顧元臣一首
顧譽二首
顧佐一首
倪瓚九首
胡瓘十首
姚文蔚三首

御選元詩卷第十目錄

樂府歌行九

王逢十六首

戴良四首

顧瑛九首

顧元臣一首

顧晉二首

顧佐一首

倪瓚九首

剡韶十首

姚文奐三首



呂誠六首

周砥一首

張簡七首

李贊五首

陸友一首

張師賢一首

沈性一首

衛仁近二首

繆侶一首

樂馬鑾三首

岳榆二首

御選元詩卷一目錄

袁嵩二首

文質三首

顧敬一首

陸仁八首

沈右一首

張田一首

舒頔七首

舒遜二首

周霆震十四首

楊翮三首

張端二首

吳志淳一首

留睿一首

鄭洪二首

王中一首

華幼武三首

葉顥二首

...

...

...

...

...

御選元詩卷第十

兩樂府歌行九

王逢

銀瓶娘子辭

并序

娘子宋岳鄂王女聞王被收負銀瓶投井死祠今

王當在浙西憲司之左逢感其節敬為之辭

蒼梧月落烏號霜寒泉幽凝金井牀綺疏光流大星白

夢驚萬里長城亡女郎報父收囹圄匍匐將身贖無所

官家聖明如漢主妾心愧死緹縈女并臨交衢下通海

海枯衢遷井不改銀瓶同沉意有在萬歲千春露神采

魂今歸來風冷然思陵無樹容啼鶻先王墓木西湖邊

淮安忠武王箭歌題垂虹橋亭

淮王昔下江南城萬竈兵擁雙霓旌錦衣繡帽白玉帶
金戈鐵馬紅鞶纓阜鵬羽箭三十六一一插向魴魚箠
鹿麕晝號猿抱木王師所過全生育彤弓親授聖天子
弓影射入東吳水水波恍浸銅柱標仰見浮屠半霄起
王當是時戢武功指顧草樹生春風宋家降璽朝暮得
思罷貫革垂無窮浮屠上層龍所宮寶盤紺碧蓮花同
弦張滿月報騶發忽露半筇薌雲中鏡歌啁轟鼓笳競
父老頓足歡聲應泗州使返睢陽亡漢關將入天山定
兩賢成敗關衰盛雄才逸氣王誰並我浮扁舟五湖興
載拜何由重安靖猛士經過合深省

婦董行

并序

婦董滕人劉進妻也進與兄順並以勇稱金季山
東亂盜蜂起因共募丁壯保里閭天兵駐嶧山進
單騎覘之中流矢死順徙家淮南舉室溺淮水董
為宋招撫呂文德裨將所獲欲犯之度不免乃謂
曰夫喪不遠家難薦臻一身流離婉在旦暮死生
非我有願將軍勿疑夜果生一男先是順已入濟
州愬於石太尉珪曰順有弟不幸沒於敵其妻在
孕為南軍拘幽舟中萬一不得收遺息使弟為厲
實順之罪也惟明公是圖石為發步卒三百人跡
其所往次淮陽始知董所在陰使人偵之生子蓋

三日矣及見具道順意董悲感不自勝且收淚曰
妾以姪不得先夫死今幸不辱先所天使有後皆
伯賜敢名此子曰伯祐以志不忘遂抱授偵者目
送數十步投江以死至正五年秋進元孫士行語
其事於逢逢高其節義作詩哀之

北軍南軍和議時兩壘對立龍鸞旗羣雄棋峙國瓦解
乃與婦董光門楣星辰錯亂風雲氣乾坤造就冰雪姿
渾家性命葬魚腹一舸涕淚隨鷓鴣夸長眠自足為義鬼
後死只望予孤兒兒在腹中兵在目憶夫心頭臂消肉
日晝慘慘陰靈啼夜黑冥冥波浪觸馬駝磧遠暗塵土
雞犬村空疎樹木嶧山誰收白玉骨蔡州地陷黃金屋

太尉前歸明主化招撫姑存寡妻宿羞看人面問消息
強通語笑寬羈束伯順見義勇著鞭銳士協力爭鋒先
道傍弩伏荆棘底掌上珠還江海邊將門有後傳世世
墓祭無所從年年湘妃摻袂遡寥廓漢女結珮窮幽元
縞衣綦中共縹緲文魚赤鯁長周旋脣亡未久齒亦喪
獨聞其風猶凜然中原山河想如故目斷幾點滕州煙

竹枝詞

溪上鷺兒柳色黃溪邊花樹妾身長浮藻可是無情物
采得歸來好遺郎
道傍花發野薔薇綠刺長條絆客衣不及沙邊水楊柳
葉間開眼望郎歸

小遊仙詞

西王春宴百娉婷玉碧桃花滿洞局自飲一杯瑤屑露
東風吹夢不曾醒

雲幢煙節紫霞裾齊御冷風集步虛若受人間塵一點
長門又屬漢相如

壯士歌

明月皎皎白玉盤大星煌煌黃金丸壯士解甲投馬鞍
蒺藜草深衣夜寒劒頭飲血何時乾

寒機女詞

鴛鴦機滿東西舍雪繭繰來日相射世俗競染紅藍花
妾心鍾愛金絲柘君王錦繡焚殿前天孫鳳梭蛛網懸

織成雲霧製龍衮萬一熏香分御筵

君家柳

君家柳萬株一色鶯黃酒龍鱗波暖裊翠煙飛花直渡
江南天倉庚立曉燕穿午薄暮啄木聲丁然腹中樹蝕
皮齧馬舊陰半減金城下長條短條屬行人猶有持斤
睨之者秋來大地落葉鳴心憶陽春淚如瀉

合淝東遂菴學正為畫君山酹月圖長歌奉謝

憶攜蓉城霞吾鄉酒名醉賞君山雪興酣俯崖面三酹大江月

靈奇珍怪不可說回首十年塵土熱束卿想像作此圖

如見當時眼為豁是山傑立氣皓鮮四八賓從咸華顛

吾鄉有三十三山君山為之主銀濤絲縈料角海料角池名遠在通州玉臺鏡露峨眉煙

峨眉嘴即在君山下

槎牙亂樹拔虎窟撇捩小艇吞龍淵樵子罷斧

僧罷磬木瓢一箇滄茫前君不見江山元與天地闢有

月無人景虛擲崑岷東來幾萬里衣冠雲散三千客三

千客後世屢易曉事僅有羅春伯事見郡志龜趺榴豎鬼照火

鼇背蒼涼獸交迹君不見采石紫綺裘赤壁洞簫歌樂

者信曠達齷齪將如何歲云暮矣雙鬢皤夢恍茅屋牽

青蘿廣寒白兔下相杵貝闕鮫女趨鳴梭卿聞大叫就

當隱指日莫問魯陽戈

古宮怨二首錄一首

萬年枝上月團團一色珠衣立露寒獨有君王遙認得

扇開雙尾簇紅鸞

世間萬江邊竹枝詞八首錄四首

亂石砑聲大小灣石中無玉作連環楚江風浪吳煙雨

翠鎖修眉八字山

社酒吹香新燕飛游人裙幄占灣磯如刀江鱗白盈尺

不獨河鮑天下稀

巫子驚湍天下聞商人望拜小龍君茹蘆草染榴紅紙

好剪凌波十幅裙

潮落蟆山連狗沙黃泥鞵浦趁江斜阿儂十指年嬌小

曾比箇中春荻芽

狗叫沙在蔡港西北歲產荻芽子家分佃頃半沙與蝦碁山鞵浦相連

戴良

三婦豔詞

印選元詩

卷一

王逢

戴良

五

御選元詩 卷一
大婦蕩湖舫中婦歌采蓮小婦獨嬌態含羞辭未宣牽
蓬掩花面何處不堪憐

艾如張

翠為衿錦為衣朝朝暮暮澤水飛澤中青草深且茂莫
聽爾媒登壘雒頭西接桃李場蓬藿艾盡有羅張羅
雖可避機莫測爾誤觸之恐身傷請看舊日張羅處祥
鳳冥鴻不肯顧

游山至葉仲容家飲散因為醉歌

石林古邨鬱深窈幾處樓居插晴昊主人喜我攜客來
隔屋頻呼酒家保老來厭受樊籠束十日山行恣幽討
世間萬事良可知一杯且此開懷抱座中高士毛雲莊

滿腹詩才鬪葩藻自從偕我林壑遊得句幾回驚絕倒
况逢地主亦善詩時出新篇慰枯槁安得思如劉沈輩
席上同吟醉歌好窗縈月練愛宵遲樓度日車嫌曙早
衆賓固盡新知樂賤子獨懷心慄慄有家遠在越水東
數口漂流千里道身心已同風撼木壽命何殊露垂草
柴桑未返彭澤翁同谷空悲杜陵老好斟澗水添酒杯
盡把閒愁醉中掃

題何監丞畫山水歌

至正以來畫山水祕監何侯擅其美帝御宣文數名見
抽毫幾動天顏喜有時詔許閱內儲名筆班班世所無
王吳李范已心識餘者山堆皆手摹海內畫工亦無數

御選元言 卷一
才似何侯豈多遇權門貴戚虛左迎往往高堂起煙霧
人間一筆不可得門外車徒漫如織葉君使還親集送
乘興始肯留真蹟於時在座總儒冠王鄭歌辭晚更妍
豈無片語道離恨見侯之畫筆盡指此畫攜歸在鄉縣
萬壑千巖眼中見却憶都門送別時回頭瞥覩西山面
莫言短幅僅盈咫遠勢固當論萬里既似山河月裏明
復同衡霍牖中起葉君眼力老愈光愛之不減雲錦章
年來行橐盡拋棄惟將此紙什襲藏何侯遷官定何處
有客披圖正傾慕北騎南轅儻相值煩君為我致毫素
請侯一寫滄洲趣

顧瑛

玉鸞謠 并序

楊廉夫昔有二鐵笛字之曰鐵龍今亡其一偶得
蒼玉簫一枚字為玉鸞以配鐵龍廉夫喜甚復以
書來索賦玉鸞謠志來自云至正甲午三月既望
界溪顧瑛書於柳塘春

七寶城中夜吹笛舞按白鸞三十隻箇中小玉號細腰
尾拂廣林秋月白伐毛脫骨秋風裏素頸圓長尺有咫
中虛一竅混沌通上有連珠七星子羿妻久閉結璘臺
弄玉求之遺蕭史調得仙家別鵠聲吹落虎頭金粟耳
桂園仙伯楊鐵翁昔豢洞庭雙鐵龍雌龍入海去不返
雄龍鰥處瓊林宮宮中夜夜泣寒雨幽咽悲啼作人語

御選元言 卷一
燃犀莫照玉鏡臺買絲難繫藍橋杵虎頭憐之為媾婚
并刀翦紙招鸞魂鸞之來兮洞房曉恍然枕席生春溫
鐵仙翁笑拍手左瓊瓊右柳柳瓊瓊細舞柳柳歌起勸
虎頭三進酒畫堂龜甲開屏風翠煙凝暖春雲濃大瓶
酒瀉鸚鵡綠滿頭花插鴛鴦紅鸞兮運居巢龍兮弄橫
竹君山月落大江秋黃姑星隕崑岡玉不須再奏合歡
辭且聽和鸞太平曲太平曲斷還續一轉一拍相節促
諧宮協徵宣八風寒谷能令生五穀鸞龍臺上鳳皇來
萬歲八音調玉燭

花游曲同張貞居游石湖和楊廉夫韻

真孃墓下花溟濛碧梢小鳥啼春風蘭舟搖搖落花裏

唱徹吳歌弄吳水十三女子楊柳門青絲盤髻鬱金裙
折花賣眼一回步蛺蝶雙飛上春墓老仙醉弄鐵笛來
瓊花起作回風杯興酣鯨吸瑪瑙碗立按鳴箏促象板
午光小落行春西碧桃花下題新題西家忽遣青鳥使
致書殷勤招再四當筵奪得鳳頭箋大寫仙人蹋鞠篇
西湖竹枝詞
素雲缺月挂秋河聽得臨風白苧歌湖水西來流不斷
海潮東去是風波

陌上采桑桑葉稀家中看蠶怕蠶飢大姑要織迴文錦
小姑要織嫁時衣

漁莊欵乃歌

返照移晴入綺窗芙蓉楊柳滿秋江漁童欸乃蕩舟去
驚起錦鳧飛一雙

金杯素手玉嬋娟照見青天月子圓錦箏彈盡鴛鴦曲
都在秋風十四絃

白雲海銘詞

虞山幾千疊千疊白雲飛出山變蒼狗入山爲白衣不
如化作雙白鶴飛向白雲深處落向余能解說前身不
是當初舊城郭

白雲樓歌

白雲深白雲深白雲飛來知我心笑看觸石起膚寸斯
須變作漫天陰山人驅雲飛出牖一道龍光射南斗大

孤

星落落小星明萬物區區等芻狗舉手招歸懷抱裏三
日顛風吹不起怒排兩脚走空來卷入銀河一泓水四
野紛紛未倒戈其奈山人不出何有時乘雲釣東海世
上空尋張志和萬松嶺上雲如絮天賜山人作孤注明
朝說與雲中君白雲之樓是常住

白雲深白雲深高樓結在雲中心樓中之人白雲友日
日醉臥梨花陰大笑白雲對戶牖肘後黃金大於斗草
間逐兔縱得之九鼎熱油烹走狗爭如高臥高樓裏未
聽催歸聽喚起釣竿不釣北溟魚酒杯倒吸西江水何
須逐日怒揮戈其若花開雪落何空將朽索馭快馬籥
雲放轡追羲和樓外晴雲擘飛絮手拍闌干目如注青

山排闥四海來面面青山白雲住

顧元臣

竹枝詞

牡丹開時花滿闌芍藥開時春已殘等過三春今半夏
重樓日日倚闌干

顧晉

竹枝詞

楊白花開風滿天花開成絮不成綿不如落向西湖水
化作浮萍箇箇圓
郎子別時秋月明說道歸時春水生曉起門前聽過馬
馬嘶都是别人行

顧佐

竹枝詞

阿儂心似潮水清願郎心似湖月明南山雲起北山雨
雲雨明朝何處晴

倪瓚

餘不溪詞

并序

開元館在餘不溪濱距溪無百步上清王真人所
立溪流冬夏盈演玉光澄映與他水特異故為名
焉庚午歲春因市藥過浙江趨便道將歸梅里俛
斯水而悅之泝流閑咏盥濯平津顧瞻壇宇近在
東麓遂舍舟造其下真人為出酒脯燕歡巖洞竟

日乃返悠悠徂歲忽已十有七寒暑矣余既爲農
畝畝身依稼穡復爾政繁奔走州里欲爲昔游其
可得乎鍊師遐騫物表閒情夸朗周覽宇內將還
真館余因仿像疇昔之所覩極道山之清婉追賦
短章以餞斯別若夫超蹤溷濁逍遙元邁蓋深志
於是矣覽而咏言能無動悲慨乎

餘不溪水涵綠蕙微風吹波蹙龍鱗看山蕩槩不知遠
兩岸桃花飛接人溪迴路轉松風急竹林華房霞氣濕
忽逢道士頽而長疑是韓國張子房相期飄拂紫煙裏
下攬滄溟浮玉觴

醉歌行次韻酬李徵君春日過草堂賦贈

杜陵昔年有茅屋浣花溪邊錦江曲古人不見春風來
桃李無言自山麓石牀蘚澀青泥乾決渠流水夜潺湲
可憐寶劔埋黃土空餘山月照波間今我不樂空懷古
短世長年誰比數花下那知李白來山鳥恣歌童亦舞
酒酣大笑五情熱作相形求築巖說夷齊相逝居首陽
逍遙采薇飽芳潔勿歌虞夏黃農詩賢愚等是百年期
魯連恥秦亦蹈海笑爾局促商山芝少文壁間對圖畫
莫待老來難命駕仰看翕忽浮雲馳安得乘螭與之化
漠漠楊花縈遠天迸壑晴雷驚醉眠李侯神爽色不動
手中茶雪落輕煙逢君此樂誠草草便欲攜君卧煙島
海上千年白鶴飛世人胡爲而自老

竹枝詞

并序 錄四首

會稽楊廉夫邀余同賦西湖竹枝歌余嘗暮春登
 瀕湖諸山而眺覽見其浦淑沿洄雲氣出沒慨然
 有感於中欲託之音調以申其悲歎久未能成章
 也因覩斯作為之心動言宣為詞凡八首皆道眼
 前不求工也

錢王墓田松柏稀岳王祠堂在湖西西泠橋邊春草綠
 飛來峰頭烏夜啼
 湖邊女兒紅粉妝不學羅敷春采桑學成飛燕春風舞
 嫁與燕山遊冶郎
 春愁如雪不能消又見清明賣柳條傷心玉照堂前月

空照錢唐夜夜潮

嗷嗷歸鴈度春江明月清波鴈影雙化作斜行箏上字
 長彈幽恨隔紗窗

聞竹枝歌因效其聲

鈿山湖影接松江橘葉青青柿葉黃要寫新愁寄音信
 西風斷鴈不成行
 江流不住楚山青船到潯陽幾日程不忍寄將雙淚去
 門前潮落又潮生

惻惻行

并序

三月十五日陸元素將從梁鴻山歸吳淞之上是
 夕坐至夜分始別予入舟賦此追至梁鴻山寄之

以定及冬重來之約

惻惻復惻惻憂思從中發感子遠來訪畏子遽言別不
有同心人何以慰孤寂矧茲夏春交蕭艾盈路側江水
亦浩漾風帆還飄突行將阻攜手轉覺意忽忽交好匪
在今高誼敦自昔人生寧無別所悲歲時易坐歎辛夷
紫還傷蕙草碧僕夫竊相告怪我悲憤塞山中梁鴻栖
江上陸機宅井田今蕪穢鶴唳亦寂寂子往經其壩徘
徊但陳迹天地真旅舍身世等行客汎汎何如損皎皎
奚自益修短諒同歸數面聊歡懌

剡韶

寄遠曲

朔雪滿天山征人去不還惟應隴頭月照見玉門關

伐桂辭

莫斫桂樹莫斫桂樹上有慈烏反哺桂樹有花慈烏有
母實傷汝心匪傷汝斧

次韻倪元鎮雙燕吟

雙燕雙燕復雙燕年去年來幾相見東風花落杏梁深
不比朝飛雉帶箭主人長年不知還夢隨胡蝶千萬山
人生那似雙飛燕去去來來梁棟間

望潮曲

夕風吹白波江樹搖綠煙行人望湖水心與滄溟連搏
桑東來三萬里曉看浴日重淵底迺知碧海與天通只

御選元言 卷十
隔銀河一絲水美人住在東海頭身輕嫁與千戶侯頻
年轉粟直沽口檣頭夜夜望牽牛

石榴花辭

石榴花為誰好一樹垂垂向官道年年花落復花開不
覺前年人易老去年花開白日長長官載酒來稱觴流
鶯蛺蝶共飛舞不惜醉倒花樹傍今年花開秋可憐纍
纍結子滿樹顛無人載酒花下飲只說花開勝去年去
年今年兩結子雨露生成有如此人老不似花再開莫
惜載酒花前來

西湖竹枝詞六首

錄四首

十五女兒羅結垂照水學畫雙蛾眉長橋橋下彎彎月

偏向儂家照別離

妾家西湖住橫塘門前楊柳萬條長憑郎醉後莫折斷
留待重來繫馬韁

闌鎖六橋春水深鴛鴦鷓鴣蕩人心吳兒生長自吳語
却向船頭學楚吟
湖上荷花嬌欲語湖中女兒木蘭舟荷花折得渾自好
只恐荷盤不耐秋

春江曲送唐閔之入關

二月春草青三月春水肥楊柳蕩洲渚胡蝶作團飛美
人向何處望望隔煙霧迢遞越王城青山海中樹海水
高入天上與銀河連相思瘴雲合目送南飛鳶

姚文奩

竹枝詞四首

錄三首

儂家只在斷橋邊
勸郎切莫下湖船
湖船無柁難輕託
白日風波在眼前
冰肌玉骨自清涼
藕花十里錦雲香
一朵紅衣初脫卸
却將蓮子打鴛鴦
家住西湖第四橋
自從卅角學吹簫
年來愁得兩鬢雪
吹盡春風那得消

呂誠

江水辭送友人之龍江

江水一百里南風
一日程飛花多意緒
相逐柁樓行

江水五百里
上有蘭與芷
采之遺我思
含情似江水

采蓮曲

刺船水中央
攏船乘晚涼
近番灘上過
葉裏好鴛鴦
盈盈藕上花
采采墮清淚
願將心中絲
繫君雙玉珮

蹋鞠篇

江南稚女顏色新
百花樓前蹋繡輪
紅葉小鞦不動塵
不動塵放嬌態
微風來舞裙帶
芙蓉小踟躕
曉風金碧步
搖聲丁冬繡衫窄
窄交斜紅
交斜紅露玉腕
揮紫綿浥香汗

周砥

放歌行贈宋君仲温

今日非昨日今年非去年天地不同老日月豈停旋寸
心遙遙顏色改只似秋蓬與夏蓮柏梁賦詩不早上長
楸走馬未得前閭闔九重虎豹守我欲上訴無因緣荆
山泣玉徒自苦夷門抱關誰復賢寶劍夫容拂秋月高
歌對酒聲哽咽當時輕意千古事幽憤於今向誰雪蘭
臺公子天下奇心膽豈足他人知荆卿不荅魯句踐項
羽豈顧齊安期東吳市上花漠漠相逢意氣傾山嶽笑
說秦關百二重舒卷風雲不盈握一生不識平陽奴况
是霍家馮子都明珠白璧等糞壤玉環翠袖皆蟲蛆甘
心廓落事屠釣矯如游龍不可拘宋公子爾彈琴我放
歌白晝苦短夜何多黃金高臺幾千尺翳日浮雲奈若

何處東風尋就暮林外當風森森吹散五嶺關千曲
吳云張簡主春即五土嶽林今滿青野鳥空望中交脚

醉樵歌

東吳市中逢醉樵鐵冠敝側髮飄蕭兩肩矻矻何所負
青松一枝懸酒瓢自言華蓋峰頭住足跡踏遍人間路
學書學劍總不成惟有飲酒得真趣管樂本是王霸才
松喬自有煙霞具手持崑岡白玉斧曾向月裏砍桂樹
月裏仙人不我嗔特令下飲洞庭春興來一吸海水盡
却把珊瑚樵作薪醒時邂逅逢王質石上看棋黃鵠立
斧柯爛盡不成仙不如一醉三千日於今老去名空在
處處題詩償酒債淋漓醉墨落人間夜夜風雷起光怪

和鐵崖小臨海十首 錄六首

海靜不揚波仙人控鶴過靈峰七十二何處月明多
扁舟下彭蠡望見古君山只道支機石移來天漢灣
歌罷霓裳曲分行舞廣庭天壇看星斗散亂若浮萍
夜過洞庭曲青山玉作堆仙人吹鐵笛白鶴自飛來
仙花雲萬疊浩劫與春開却笑珊瑚樹焦枯作死灰
海上三神嶠嘗看羽蓋飄玉虹三百丈噓氣結成橋

東吳李瓚

柳枝詞

吳江綠水生春明江上柳枝今漸青棲鳥啞啞中夜鳴
愁絕東風長短亭柳枝當戶森成束思婦正倚闌干曲

別情有恨不可解萬里相思淚盈掬愁多不織流黃機
織得迴文更慳悽功名悞人不足恃橐砧橐砧何日歸

春草曲

春風百草生何許伊流之洲澧之浦荃蘅蘭蕙與芳杜
馨香采色紛無數鶗鴂先鳴衆芳舉萬綠如煙花欲語
王孫遊子去湘楚靡蕪開謝山之阻春草無情情獨苦
別離恨深迺終古春草生淚如雨

歸鴻曲

高秋鴻鴈來仲春鴻鴈歸關河道路遠沙場聲韻悲去
年曾寄帛書去迴文織就相思句橐砧遠在邊城戍高
樓不見絕心緒愁多別久淚闌干何日歸來再合歡一

聽歸鴻一生怨揚子江南春雨寒

擊楫行

日華悠悠江色清碧波萬里生春明商婦琵琶怨別生
擊楫渡江舟正行美人美人既無情灑蘭沅芷揚芳馨
欲見不見心怦怦輕風吹羅裳擊楫且勿忙恐驚菰蒲
中交頸雙鴛鴦莫學桃根與桃葉渡江一去音信絕江
上春來復春去對此流光淚盈睫

戴勝行

江臯春暖桑盈野三農耦耜蠶事舉嗟爾戴勝胡為來
乃有鳴聲驚織婦戴勝來降於桑采采麗羽何清揚天
時月令仍相當茲禽一鳴穀雨至農人聞之興耒耜蠶

成繅絲秧及時

陸友

桂之樹

桂之樹褰我衣秋風昨夜起遊子送將歸明年春水盛
鼓楫下江磯

張師賢

和西湖竹枝詞

孤山脚下三叉路孤山墓上好梅花不似馬塍桃李樹
隨春供送到人家

沈性

和西湖竹枝詞

儂住西湖日日愁郎船只在東江頭憑誰移得吳山去
湖水江波一處流

衛仁近

秋夜曲

誰家女兒青結螺花前雙歌舞婆娑湘簾在鈎明月多
奈此迢迢涼夜何
銀河流光夜初靜姮娥娟娟度鸞影綺疏美酒醉方醒
倚闌吹簫更漏永

繆俚

和西湖竹枝詞

初三月子似彎弓照見花開月月紅月裏蟾蜍花上蝶

憐渠不到斷橋東

馬磨

春夜樂

越羅複幔茱萸紅蹙金繡帶蟠雙龍銅盤膩燭傳香蠟
簾箔星光釘文甲金刀割紅翠釜烹苴菹壓春頰玉罌
神仙舞盤踏月行鴈沙印雪留雲纓朱絲泠泠金粟柱
風流上客瓊林主碧海煙中采香婦濕花仙骨霑春雨

和花游曲

綺樓十二浮空濛寶衣翠絡熏麝風宮妝窈窕銀屏裏
鸚鵡呼名隔江水荔枝木瓜花覆門珠珮丁東搖曲裙
館娃宮裏潘妃步贏得一丘紅粉墓探花仙子何處來

乳酒百罰行深杯夜闌酒倒揮玉椀遮莫城頭催漏板
人生一身東復西花游日日須留題尚記題詩動宮使
字落驪珠三十四金花重賜五雲箋製作清平樂府篇

獨酌謠

獨酌謠獨酌當中宵中宵萬籟寂獨酌興歌謠玉露下
金井銀河沉素濤一酌再酌神思超安得十洲仙人共
傾倒駕風鞭霆歷覽八極同遊遨魯戈莫揮斥義車莫
招搖便當甕頭醉笑解黃金貂君不見車輪馬足長安
道雞鳴五更天未曉又不見北邙風雨跡如埽石駝斷
碣眠秋草天飈泠泠吹我襟獨酌獨酌慰我心流光去
人那復得洗盞自歌還自吟

岳榆

漁莊欵乃歌

文竿比日出清波翠袖香醪金叵羅涼月團團當檻白
秋光冉冉隔簾多

黃花丹樹老漁莊錦瑟秋風子夜長驚起水禽棲不穩
背人飛去不成行

袁曷

漁莊欵乃歌

秋水芙蓉面面開錦堂低護小蓬萊夜深莫把珠簾下
恐有青鸞月底來

玉人花下按涼州白鴈低飛箇箇秋彈徹驪珠三萬斛

當筵博得錦纏頭

文質

月漉漉送瞿慧夫之練川

月漉漉在婁水老蟾千年浸不死容華已萎春蕙芳弦
望茫茫運天髓月漉漉在練水桂影無煙玉如洗一天
清吹涼參差琉璃碧破飛魚起我家月明滄海曲漁歌
不驚鷗夢熟脫巾醉卧竹葉舟白頭浪起高於屋送君
行月漉漉

折楊柳

折楊柳煩纖手金黃細縷牽春愁送客年年汴河口汴
水明楊柳青此時傷心無限情同心結就孤舟行折揚

柳君知否有書莫寄雙鯉魚一度春風一回首

白雲海歌

白雲深白雲深白雲深處元無心眼空瑤海一萬里山
光不動秋陰陰虛白英英啓扁牖袖拂天開落星斗盡
隨玉氣化為龍不逐西風變蒼狗道人高居白雲裏九
重丹書徵不起三生石上話因緣春夢梨花隔秋水風
塵眯目橫干戈龍吞虎噬奈爾何斷蛇神器未出匣海
宇無復春光和世事紛紛為落絮百歲流光水東注白
雲與我有深期我亦相依白雲住

顧敬

和西湖竹枝詞

御選元詩 卷十
樓船女兒日晚歌蓮心結子縮雙螺湖水蕭蕭湖月白
奈此湖中涼夜何

陸仁

春波曲

青青太湖波小小芙蓉楫舟輕弗解操水深那敢涉

野田雀

野雀飛在田化爲田中鼠黍稌動連雲鼠食那知止

柳枝曲

朝垂金門雨暮拂玉闌風飛絮高高去枝葉在深宮

缺月詞

月體無虧缺日照乃自偏安得長合璧與天相周旋

精衛詞

精衛兩翼大飛向海波去口銜石子不知數山高高海
深深山高水深石自沉

招鵠詞

黃鵠兮黃鵠騫翻子扶搖一飛兮絕泰華再飛兮冲層
霄鵠子無弟與兄若將求其曹於乎鵠兮心怕勞燕雀
在樊兮食且飽樂且不憂中林有木子木有巢鵠乎歸
乎無遠遨

石婦詞

鳥鳴孤竹岡春花復斑斑江水日東落行人殊未還妾
孤處妾之心白於水水白泥可渾妾心潔且明望夫不

歸那忍生精神忽通化為石千秋萬年岡上立

思公子寄馬希遠

蟋蟀兮在戶菊始花兮婀娜擘芳兮延佇思公子兮江
之左荃橈子桂旂江流兮泌清絙朱絃兮橫琴茶甘如
薺兮楚酒馨宛迤兮婁水靡蕪黃兮夕雨婁之上兮有
園與廬思公子兮歸乎樂只

漁莊欸乃歌 并序 錄二首

至正辛卯秋九月十四日玉山燕客於漁莊之上
芙蓉如城水禽交飛臨流展席俯見游鯉日既夕
天宇微肅月色與水光蕩搖櫺檻間遐情逸思使
人浩然有凌雲之想玉山俾侍姬小瓊英調鳴箏

飛觴傳令歡飲盡酣玉山口占二絕命坐客屬賦
之賦成令漁童樵青乘小榜倚歌於蒼茫煙浦中
韻度清暢音節婉麗則知三湘五湖蕭條寂寥那
得有此樂也賦得二十章名之曰漁莊欸乃歌云
灣灣流水曲闌干鷓鴣芙蓉不耐寒玉手為開銀屈膝
舉頭却見月團團

日暮休憑鬪鴨闌落霞飛去水漫漫秋光都在重屏裏
東面青山是馬鞍

沈右

和西湖竹枝詞

勸郎莫向花下迷勸郎莫待醉如泥臨行更有分明語

御選元詩 卷一
枝上流鶯休亂啼

張田

西湖竹枝詞

潮去潮來春復秋
錢塘江水通湖頭
願郎也似江潮水
暮去朝來不斷流

舒頔

百牛圖歌

繫誰畫此百牛圖
絹素淋漓懸兩壁
摩挲細認角頭奇
無乃戴嵩留宦墨
牧童騎策過前邨
春樹陰陰春草碧
雲收霧斂山花明
遠近巔崖翠光濕
平湖斷岸水淺深
皺縠粼粼如展席
犢眠草間牛不乳
飢齧青芻礪蒼石

或飲或浴雲滿身
物我相忘祇自得
橫斜體態百頭殊
牧豎籠雛戲阡陌
有時背上顛倒騎
細雨斜陽橫短笛
時平放爾桃林中
布穀催畊苦相迫
嗚呼比年兵革彌
天下千畦萬隴生
荆棘只今農父把
鋤犁處處開畊皆
爾力斗米三錢戶
不扃四海蒼生無
菜色

織婦吟三首次知縣許由衷

妾家住西湖家貧守清素
年方二十初學織常恐暮
父母生我時不識當門戶
夫君良家子安肯受辛苦
機織不畏多但畏官府促
去年布未輸今年糧未足
阿姑八旬餘縮首檐下曝
君成憂邊庭妾心念機軸
亂絲入手中上機十數疋
細花間鸞皇精巧俗莫測
朝

餐釜底焦下盡雪下滴君心似明月願照塵苦力
絡緯吟

夕露淒以清涼颺颺然至籬根斷續聲長繭絡緯雙
股依草菱兩翼鼓元氣月明更漏遲似訴無限意微物
尚知時歎彼非物類我懷素瀟灑聞汝澹忘慮

江南曲

庭院深沉日正長綠窗紅几繡鴛鴦落花風起停鍼看
胡蝶雙雙過粉牆

繅絲歎

東家繅絲如蠟黃西家繅絲白如霜黃白絲出蠶口長
短繅出婦手大姑停車愁解官小姑剥繭愁冬寒向來

苦留二月賣去年宿債今未還手足皸瘃事亦小官府
鞭笞何日了吏胥夜打門稚耆生煩惱君不見江南人
家種麻勝種田臘月忍凍衣無邊却過廬州換木縣

舒遜

織婦吟

錦織並蒂花花成謾停梭停梭復細看人與花如何明
月照中天敗葉鳴寒柯誰知恩愛心翻成離恨多
雙星照短牖孤月懸高枝仰睇星月明對此令人悲手
持并州刀為君裁寒衣不忍密密縫此心君應知

周霆震

武昌柳

武昌柳青如許舊恨新愁千萬縷宮鶯去盡野雞栖憔悴江南誰是主朔風一夕捲栖鴉春日鶯啼憶舊家流落王孫重繫馬雨晴天氣屬楊花

軍中苦樂謠

半臂纏腰帽卷氈剪裙荷葉腿齊編市西橋外看屠狗笑擲并刀賭酒錢
堆帽紅纓間黑纓粉青宦袴短黃裙酒樓突過行人避近日新充水砦軍
旌表門前路幾彎浮圖坡下日銜山馬上長身單白紵雙雙緩轡打球還
短髮風欺破帽斜日西跣足踏紅沙妻孥待哺不遑卹

流汗擔柴赴主家

疊石支牀擁敗氈抱關擊柝日隨綠松燈自抱芒屨了要辦明朝買菜錢

劒鋒交處奮身跳箭集征袍血未消奪得紅巾衝陣馬歸塗乾被長官要

官船公子抱琵琶笑指娼船白藕花今夜江頭好風月買魚載酒宿誰家

團扇題詩愛越羅畫船載酒沸笙歌何人夜讀張巡傳獨占秋江月色多

十里長洲列戰船白頭吟客坐看天何時得見三階正獨寄蓬窗夜不眠

楊柳枝詞

離宮別館短長亭忘却江南舊日春是處人家種楊柳
往來繫馬解留人

背立東風淡畫眉斷腸煙雨一枝枝隋宮漢苑春無主
莫向江南話別離

移栽楊柳受風多南畔行人北畔過莫道浮萍是飛絮
好隨流水到官河

舞絮含愁入酒家何因得近瑣窗紗春風萬一無拘束
放去錢塘逐落花

楊翻

金谿縣孝女廟樂歌

并序

有元至正元年撫州路金谿縣新作二孝女廟成
按二孝女姓葛氏在唐寶曆間以官責其父祐虧
鍊白金事不勝暴酷皆發恚投冶中焚死父因獲
免并其邑除坑冶之害以迄於今是宜血食其土
矣國子博士吳君師道既文之石而祀神之詩闕
焉上元楊翻撰為樂歌三章俾金谿之民歲時歌
之以祠孝女其辭曰
靈之來兮兩旗張導旌旌兮鏘琳瑯續晻曖兮相頡頏
並輜輶兮歸故鄉歸故鄉兮民所望昭盼蠻兮習洋洋
庭燎輝兮夜未央椒蘭發兮鬱芬芳民報祠兮弗敢忘
心屏營兮咸肅將靈格思子民樂康

靈之留兮澹容與雲凝凝兮翳堂宇瓊筵陳兮合簫鼓
列尊罍兮酌清醑牲肥膋兮承雕俎女巫進兮傴屢舞
誦神德兮歌頌舉孰捐軀兮悟時主齊英英兮惟孝女
繼茲今兮饗終古靈醉飽兮民樂胥
靈之去兮將安之儼欲旋兮焱上馳互招搖兮爛祈祈
遵雲路兮眷威遲金有賦兮地不遺竭貨產兮民力罷
我邑井兮咸熙熙賴神惠兮獨弗罹千萬禩兮神是稽
薦蘋藻兮荅神釐靈遄逝兮民聿思

張端

賓鴻吟

鴻鴈來天雨霜鴻鴈去春日陽鴈來鴈去如嘉賓寒寒

暑暑愁殺人一聲叫落秋空雲不覺淚下霑衣巾如賓
又復如兄弟吁嗟人兮不如彼

白苧詞送孟季成崇明知

歌吳歌舞吳舞吳兒蹋浪鳴雙櫓春風袞袞送行舟新
除使君衣白苧君衣一何素娟娟照青年飄搖舉長袖
亦足相迴旋白衣之白白於鷺看時莫使緇塵汙

吳志淳

鍾陵行

并序

真定劉生客死閩中同行者為歸其骨其妻胡氏
自圖夫容以祀因哭而絕鄰人憐之遂合葬鍾陵

東門

鍾陵東門白楊樹行人指點是雙墓墓中夫婦俱少年
一雙白璧薶黃泉黃泉相逢語嗚咽一一從前向郎說
前年郎去客三山今年郎歸白骨還當時自畫蛾眉樣
今日却寫郎容顏容顏轉似心轉切叫郎不應心斷絕
生時不得逐郎行死時却與郎同穴丹青遺像留人間
年年淚竹寒生斑當年曾過延平渡還見雙龍化劍灣
堂前既無父與母堂下又無兒與女使妾有子堂有姑
丹心一寸那能枯六朝盛事付流水忠義幾人能到底
秋風月冷鳳皇來與郎同上吹簫臺

留睿

思親行寄弟子通

今年八月來作客出門倏忽日一百自從二十走湖海
零落天涯幾岑寂幾岑寂重悲歎親在高堂望子還子
在長塗衣亦單準擬明年作官食君祿歸來共汝舞袖
紅編爛天目之山去天不盈尺使我登之徘徊望鄉國
吁嗟胡不生羽翼吁嗟胡不生羽翼

鄭洪

大姑謠

大姑嫁將軍小姑未有夫小姑兩脚泥大姑滿頭珠前
月小姑去嫁作莊家婦釵削鬢下荆衣裁機上布大姑
嗔小姑生憎兒女癡多少馬上郎偏愛牧羊兒八月點
軍卒將軍五門出大姑詫夫壻上馬快如鶻昨日邊報

御選元言 卷一
歸大姑淚如揮郎君馬上死無處寄征衣連理與枯枝
雙飛成戢翅都無百夜恩浪作千歲計小姑莊上來瓦
盆雙鯉鮓上堂拜父母夫婦恣歡諧大姑見小姑珠翠
無顏色低頭怨悵天仰天呼不得人生百年良所無白
頭相送真良圖東家女郎欲嫁夫切莫猖狂學大姑

城上烏為李僉憲賦

城上烏飛畢逋雄飛啞啞雌者呼下飲九曲之清池上
集百尺之高梧烏烏一巢生九雛去年築城興萬夫家
家力役到妻孥使君勗吾我力痛蒸豚滿筐酒滿壺作
勞耳熱歌嗚嗚今年城堅如鐵石弩臺侵弓土花碧白
雲為藩樹為戟朱旗星流落日赤馬鳴蕭蕭人寂寂六

門虎賁晨晏食城頭高高如屋極烏朝出飛暮來息雌
雄哺雛乳而翼城上烏畢逋尾九雛羽翼成飛去青雲
裏江南無好樹處處烽煙起危枝繞遍不堪棲昨日歸
來舊巢底使君青驄馬繫在垂楊下手中金僕姑不驚
城上烏恩情雙飛鳥遺愛在中吳使君去幾時回新城
高百雉仰德並崔嵬

王中

長門怨

昭陽歌吹入獨自淚雙垂玉貌無如妾君恩復在誰涼
風搖繡戶明月墮金閨愁絕無人見流螢點翠帷

華幼武

雁南飛

雁南飛飛不住暮暮朝朝不穩棲飛向水窮山盡處水窮山盡天南頭年來有客離家愁天空無雲明月夜千里萬里清光流家園零落秋風遍人聞雁聲淚如綫雁兮雁兮可奈何稻梁多處多網羅

編籬曲

編竹籬密密編朝禦雞犬入暮防豺虎穿交加編聯互相倚竹密藤纏堅莫比春風披拂百花開一片繁華如錦綺君不見西家有籬編不密夜夜驚呼防盜賊願言兄弟莫相疑明日齊心編竹籬

養竹軒歌為周莊吳達子道賦

高軒公子良不俗不種奇花種修竹奇花照眼一時紅修竹虚心萬年綠春雷擊地新筍生龍角森森那忍觸自鉏暖土厚栽培手挈銀瓶細澆沃深根埽除螻蛄窟香葉終期鳳皇宿日使霑濡雨露恩歲寒豈憚冰霜酷猗猗繞戶矗琅玕含霧連煙比淇澳招搖皓月金瑣碎勾引清風聲戛玉炎天展簟臥蒼雪春日聽鶯泛醴醕可能一日暫相忘坐對此君看不足君不見白樂天重言養竹比養賢又不見東坡詩無竹士俗不可醫君今有竹善培養會看直拂青雲上

葉顥

漁父曲

御選元詩卷第十一
雨過暮雲收江空涼月出輕蓑獨釣翁一曲秋風笛宿
鷺忽驚飛點破煙波碧

采蓮歌

越女浙江頭煙波萬頃愁往來荷葉浦蕩漾木蘭舟島
闊香雲冷江空明月秋清謳三四曲聲斷白蘋洲天重

御選元詩卷第十

樂府歌行十
郭鈺十二首
劉永之三首
盛彧二首
丁鶴年三首
吳惟善一首
趙汭一首
謝應芳四首
沈貞七首
張庸二首

御選元詩卷第十一目錄

樂府歌行十

郭鈺十二首

劉永之三首

盛彧二首

丁鶴年三首

吳惟善一首

趙汭一首

謝應芳四首

沈貞七首

張庸二首

郭文一首

金信一首

馬臻七首

查居廣一首

李道坦二首

張雨十二首

富恕一首

于立三首

道英二首

希陵二首

明本一首
十一目錄

與恭一首
惠英十首

行端一首
續一首

清珙八首
前一首

覺恩一首

元鼎一首
喜首

文信四首
曾九三首

照一首

超珍一首

壽寧一首

椿一首

良震一首

淨圭八首

宗衍一首

惟則一首

善學四首

大圭一首

魏國夫人管氏三首

鄭氏允端二首

余季女五首

士女曹妙清一首

士女張妙靜一首

薛氏蘭英蕙英十首

徐氏女一首

鄭奎妻四首

張氏二首

無名氏四首

劉妙容一首

宗衍一首
 惟則一首
 善學四首
 大圭一首
 魏國夫人宮氏三首
 隱母容一首
 無名九四首
 素月二首
 漢全長四首
 翁月女一首

御選元詩卷第十一

樂府歌行十

郭鈺

控郎馬妾心悲留郎住郎苦辭少年只願封侯早不惜

蛾眉鏡中老銀鞍金勒珊瑚鞭白水青山千里道控郎

馬郎駐鞍郎飲莫須盡酒醒郎衣寒郎心懸懸五雲下

教妾若為控郎馬馬蹄好向御街行蛾眉不向妝臺畫

子夜歌

子夜歌歌罷其如明月何牽牛織女遠相望不教精衛

填銀河妾心本如秋月白妾顏不共春風發玉兔擣藥

御選元言 卷十一
三千年近見嫦娥搔白髮
子夜歌承君蛺蝶雙花羅羅衣秋來不堪著梧桐樹上
涼風多銀燭作花好消息又想歸期在明日并刀不剪
相思愁相思誤盡曾相識

秋塘曲

高荷擁翠秋滿塘花開不見聞花香老魚吹波紫萍碎
花下飛起雙鴛鴦鴛鴦相逐低回翔藕絲易斷愁心長
玉箏不彈轆轤悄一簪華髮凝秋霜

送遠曲

為君治行近一月今晨竟作忽忽別枕邊紈扇鏡中花
一時盡變傷心色妾雖不見邊城秋君亦不識空閨愁

憶君便如君憶妾雙淚豈為他人流才貌如君長刺促
少年心事何時足歸期未定須寄書誤人莫誤燈花卜
春暮吟

玉壺酤酒青絲絡啼鳥勸人滿盃酌落紅滿地暗香消
濕翠如煙午陰薄畫樓玲瓏隔彩霞樓前雙鵲鳴喳喳
想見吳帆北風起王孫明日當還家

春夜吟

月色如水花如雲美人樓上歌迴文棲鴉飛起玉階樹
香風吹動殷紅袞去年寄書到君側書中只寫思君切
情知人老髮如絲君歸不恨緣君白插花記月夜未央
他人苦短我嫌長若使驅車到家日天涯芳草愁茫茫

四時詞

煖雲飛撲玉驄歸
簾捲香風酒力微
夜坐久憐明月好
細鋪花影繡羅衣

日射嫣紅安石榴
波涵空翠木蘭舟
美人調笑渡江去
半榻柳風碁不收

鶴認琪花欲下遲
蓬萊仙客遣催詩
情深寫到相思處
秋露芙蓉開滿池

疎林晴旭散啼鴉
高閣珠簾窳地遮
為問王孫歸也未
玉梅開到北枝花

妾薄命

孤鸞窺鏡翦情緣
淚血沾襟十五年
誰信舊時歌舞伴

相逢猶自妬嬋娟

劉永之

白苧詞

象牀玉瑱鴛鴦裯
銅盤畫燭燒紅雲
芳樽蘭勺霑朱脣
白紵高歌動梁塵
請君試聽曲意新
揮金縱歡及良辰
落葉辭條無再春
遺令高臺作歌舞
鬱鬱西陵那得聞
連枝蜀錦鋪金堂
中山旨酒實瓊觴
豹胎猩脣出中房
博山火紅夜未央
催弦促柱歌吹揚
輕身向君回玉璫
妖姿艷態世無雙
君心胡為樂遠行

行路難

涉水多蛟龍
跋山多猛虎
荒城荆棘上參天
大澤修蛇

御選元言 卷二
三
橫草莽百里黯慘無人煙驅車偵行陷泥滓前車軸折
後車來行人不覺旁人哀眼前道路已如此何況太行
高崔嵬為君歌路難請君試一聽位高金多豈足貴擊
鐘鼎食何足榮東溝水流西溝涸昨日花開今日落世
事榮枯反覆手七尺之軀安所託古來賢達人與時同
卷舒龐公鹿門隱馬生鄉曲居款段聊乘下澤車何用
終朝出畏途
學士峰頭雁正過將軍峽口柳無多雲屏露冷衣裳薄
欲擢觥船采芰荷

盛或

四時歌

錄一首

和春愁曲

鶯黃柳枝撲輕雨裊斷新愁千萬縷菱花倦拂瑣窗間
吹得瑤笙雜鶯語下牀不受春風扶傷春擊碎青珊瑚
香消玉散繡針澀閒開五色雙氍毹離恨難禁情未愜
那肯將心託紅葉翠帷深護曲闌花羞殺東家白蝴蝶
耙鹽詞

朝耙灘上泥暮煮釜中雪妾身煮鹽不辭苦恐郎耙泥
筋力竭君不見東家阿嬌紅粉媚不識把鋤巧梳髻昨
日典金釵愁殺官鹽價高貴

丁鶴年

采蓮曲

采蓮復采蓮仍唱采蓮曲若欲知苦心須食蓮中肉采
蓮復采蓮踟躕一何久不愁花妬容惟恐刺傷手采蓮
復采蓮藕亦不可棄中有不斷絲似妾纏絲意采蓮復
采蓮爭如采荷好花謝葉獨存團圓以終老采蓮復采
蓮湖水清且深徒能照妾面不能照妾心采蓮復采蓮
下有孤鴛鴦秋花不結實夜夜守空房蓮開花覆水蓮
謝藕在泥不學青萍葉隨波東復西朝采並蒂蓮暮縮
同心結不學楊柳枝含嚔送離別蓮舟何處來同住西
湖口郎憐波上花妾愛泥中藕藕有青白節花有豔冶
容郎心異妾心三歎掩歸篷

竹枝詞

竹雞啼處一聲聲山雨來時郎欲行蜀天恰似離人眼
十日都無一日晴
水上摘蓮青的的泥中采藕白纖纖却笑同根不同味
蓮心清苦藕芽甜
西賊吳惟善
小遊仙

河漢無聲海月寒長鯨吸浪洞庭乾一聲鐵笛風雲動
人在危樓第幾闌

黃星行

八月十五夜未央中天皓月懸清光大星稀少小星沒

印選元詩 卷十一 丁鶴年 吳惟善 趙沔

出門四顧山蒼蒼我生不讀甘石書但見一星明且黃
今宵不見兒童怪應隨斗柄西山外石橋徙倚聞幽香
荷葉團團大如蓋黃星明夜應復來清露為酒荷為杯
舉杯漫與黃星壽自古昆明有劫灰

謝應芳

西湖曲

西湖春水綠於酒西湖女兒嬌似柳依稀二月三月春
攀折千人萬人手我有一索青銅錢明朝也買下湖船
試歌斷臂孤兒曲湖上豈無人解傳

嚴將軍戰馬歌

并序

至正乙未春常多盜省府調兵捕之浙東宣慰司

元帥嚴公來總軍事未幾無錫平移軍武進一日
擣禾富莊賊巢軍中失二馬明日賊乘之抗官兵
烈塘上二馬聞金鼓來奔賊控勒不能止遂隨地
馬立踉殺之官兵大捷故余烈塘之民咸神其事
俾余作歌以美之

往聞齊軍夜路迷老馬前導人追隨又聞的盧躍檀前
漢業復立西南陲古來良驥稱有德未有驍騰能殺賊
將軍兩馬馱賊來雲霧四起生風雷紅綃帕首爾何物
霜蹄一踏成飛埃軍前認主鳴且舞驚倒熊羆與羆虎
羣兇膽落敢前追官軍凱還搥大鼓馬兮誠有功
須知感物由元戎將軍接迹武惠功煌煌史冊書勲庸

爾馬名示垂無窮

古鼎歌 并序

中喜萬壽寺舊藏古銅鼎其竅識有云王在周康
穆宮冊錫寰用作皇考鄭伯姬尊鼎大德中任陽
謝氏嘗欲以重寶易之時住持點翁師不從後謝
氏為構佛殿點遂以鼎荅之至正丙申謝遭兵鼎
因失去甲辰夏四月愚隱智公乃得於軍人之手
耆舊聚觀皆曰吾山中舊物也既而出鼎見示且
徵余詩以紀之

碧雲師著金伽黎空王殿上龍象隨一夫長跣送古鼎
狀若獻寶波斯兒羣緇來觀集丈室中有老夫曾致詞

云是山中舊時物立誦款識能無遺惟有臣寰紀君賜
用顯厥考鄭伯姬文詞詰屈錯盤誥字體隱伏蟠蛟螭
蒼姬訖錄世屢改不知何代來於斯謝家寶樹易趙璧
巨構賈與秦城齊鼎兮什襲去歲逾數紀今來歸
師聞此語重歎息兵火連年炎九域金鐘大鏞棄路傍
總若沈沙銷折戟珠連合浦獨無恙護持信有天龍力
摩挲兩鉉濕煙霧錯落丹砂映金碧濁水摩尼五色兼
出海珊瑚高一尺嗚呼義軒之鼎真可求禹鼎亦已淪
東周世所用者非爾儔或膨豕腹徒包羞調羹爾無與
覆餗爾不憂歸來兮歸來北山兮菟裘汾陰自有為時
出切莫放光驚斗牛

踏車婦

吳田水深三尺許猶是去年秋暮雨勸農使者催春耕
田甲頻搗水車鼓江村破屋能幾家家婦姑俱踏車
蓬飛兩鬢赤雙脚亦有兒女雙髻丫淞江太湖愁滿眼
白汗霑衣足生繭車輪鹿鹿羊角轉水波翻翻龍舌卷
春來十日九日晴不聞鶉鳩呼雨聲牛毛微颺土未濕
辛苦又加三日程當家豈無夫與子打魚糴米去城市
城中禁米難出關田上忍飢還戽水四郊未種圍田穀
三邊催運官倉粟

沈貞

樂神曲

并序

樂神曲者擬楚詞九歌而作也吳人尚鬼祀必以
巫覡迎送舞歌登獻其詞褻慢穰災邀福不知其
分滋黷甚矣故為此詞以明鬼神之理禱祀之意
祛其荒淫之志焉

保我之民兮邑此方崇其牖兮浚其隍民不驚兮志定
眷靈修兮作民命隄楊兮結陰青青兮蔽林女牆堅兮
有郭有郭繞洄灣兮濠歸於壑靈之來兮元都颺旂旌
兮若荼陳一豕兮兩踰載斟之兮百壺城兮隍兮吾永
無虞

右城隍

嗟靈伯兮御清泠洗祥歎兮滌炎蒸駘蕩兮春初颺颺

兮夏徂颼颼下兮木葉枯號空桑兮吹雪載塗靈之來
兮憑女巫巫兮屢舞箬簫兮伐鼓靈醉飽兮無怒蕭
蕭來兮颼颼去

右風伯

佩芳蘭兮擘芬椒潔新服兮綴珠珎駕靈螭兮翔重霄
要靈輅兮下迢迢我禾兮成役我田兮龜坼烈日兮驕
陽利行水兮熱湯靈之徠兮天外下土乾兮霑一漑維
靈布澤兮惠我無私嗟我民兮其敢斃思靈皇皇兮萃
只舞傲傲以醉止福襍襍兮

右雨師

月維仲兮日維剛肅齋宮兮神所藏靈輝輝兮垂佩儼

飛馭兮高蓋降靈雨兮來斯左有翁兮右有妃悵嘉期
兮難又羌永歎兮陳詞靈修修兮不語逝翩翩兮歸去

右社公

波震蕩子具區既底定兮奠神之居芙蓉兮凌車導翠
鼈兮文魚神之來兮孰俱後子皮兮前靈昏與神游兮
湖之滸衝風息兮極浦有倡兮妙舞有列兮清酤神飽
聿歸兮或返而顧灌我田兮受神之祐

右太湖神

雄何為兮厲於鄉祀有時兮享有嘗赭白馬兮青蓋明
而無兮晦而在屏方相兮去儼神巫進兮舞且歌雄欣
欣兮遠逝不水旱兮不疵厲樂吾民兮世世

兩旗兮分張舞輕風兮悠揚神之司兮我疆原田每每
今立我青秧不稂不莠兮無疔無妨時雨兮時暘俾百
穀兮登場維神兮降康報之兮肴蒸膾羊

右青苗神

張庸

賣驢買牛歌

驢可以跨不可耕牛可以耕還可跨山人賣驢歸買牛
買得牛來頗同價溪雨初收水繞門山人曉耕溪上雲
土膏不覺秋成早香秫釀成新酒渾翻思養驢竟何益
空將芻豆飽其食軀小蹄薄終無力有時跳梁蹶側石

草深牛背穩於舟浩歌白石南山秋却笑哦詩灞橋上
滿身風雪歸來休

行路難書所見

昨朝殺虎潘家園今朝殺虎蘆浦團獵人羽箭銅牙弩
連朝殺虎來送官送官歸去日將夕沙路紛紛皆虎跡
四山哮吼刮腥風手驚弩隨那能射君不見一虎死百
虎生行路難路難行

郭文

竹枝詞

金馬何曾半步行碧雞那解五更鳴儂家夫壻久離別
恰似兩山空得名

金信空對石

洞庭曲

浩蕩太湖水東西兩洞庭吹簫明月裏龍女坐來聽
湖上望蘇臺水與青天遠長風送飛帆忽到長洲苑

馬臻

湖中春遊曲

堂堂復堂堂畫鷁誰家郎繡旌鴛頸冷膳府鸞刀光傾
椒注桂邀流芳楚膏絡索聞懸璫篴篥急響如相惱岸
頭折盡忘憂草黃金慣積自媒身隨肩滿席惟嗔老牙
籤萬軸齒不黏孟客何賓迹如埽柳絲撲撲乘風吹花
翎小鳥啼訴誰玉郎沈醉晚未醒春光去矣猶不知

鷓鴣篇

鷓鴣鷓鴣不知春色何負汝每到春來聲更苦百年不
得此身安尚憶當時在行旅爾不學大鵬一舉培風兩
翼如雲垂又不學籬邊斥鴳翱翔飛躍蓬蒿枝黃陵廟
前幾春草空遺怨恨傳新詩江南二月煙花亂子子孫
孫自呼喚說盡人間行路難淒風苦雨心腸斷

雙鶴吟寄友人

依依兩白鶴歲久住青田一鶴垂兩翅飲啄沙汀煙一
鶴展長翮冥冥自冲天思之不可見獨立秋風前有時
月夜羣動息孤唳一聲山水碧凝眸側頸復裴回影落
空林風露濕故人獨抱經濟才淵珠炯炯光難埋江南

後遺元言 卷二
地暖梅花開折花待君君不來梅花歲歲開又落空向
梅邊詠雙鶴

前結交行

古交山上松青青色不改縱有霜雪侵節操固常在今
交陌上花容貌相矜誇一朝風雨至飄泊隨泥沙陳雷
管鮑世不有一貧一富難長久對面相看仰泰山下視
羣峰皆培塿嗟來乎嗟來乎牀頭黃金不可無君看金
盡失顏色壯士灰心不丈夫

後結交行

古交皆結心其意能斷金今交皆結金倏忽能變心取
舍既殊軌反掌生陸沈正平一朝忤黃祖有若將身投

猛虎子桑莫逆忘其生乃能相與無相與古人今人皆
足悲百年憂樂須臾期男兒節義死不變誰肯心懷未
濟時嗚呼誰肯心懷未濟時

烏夜啼

烏夜啼朝啼東方白夜啼林影黑關河萬里天雨霜月
冷夜長眠不得烏夜啼憐爾巢中黃口時哺腥吞腐羽
毛長母子日日長追隨一旦離羣自成偶相呼相喚期
相守故雄零落不復知留得孤雌住衰柳柳條蕭颯難
棲身夢驚三月楊花春載飛載止情莫伸欲去不去愁
殺人不知挾彈誰家子暴物傷生苦如此哀音散入江
湖間老屋破窗燈欲死烏夜啼君豈知

嗟餘春

春雨足春水滿岸花匝匝光風暖人間杜宇最知機啼
得血流春不管迷芳著物苦忘歸直待楊花似雪飛多
少好懷成別恨餘香沁入野薔薇

查居廣

孝子行 并序

豐城廖孝子至元十九年鄉寇大作子負母冒刃
逃反靖孝養終身與江革不殊惜無史書之揭翰
林近題其墓曰有元純孝廖某之墓又為作文刻
石虞學士書之

豐城昔在至元歲寇賊紛紛亂如鬼是時廖生抱母行

不死白刃天有情固知至願天必感母子全活見太平
廖生雖死猶未死往往遺民言此事有如江革遭亂離
負母潛逃經險阻情詞惻惻賊舍之孝德還堪耀今古
嗚呼薄俗獯獍同墓上請看純孝子

李道坦

山中苦寒歌

深山苦寒弗可居門前積雪三尺餘陰崖一夜石蛻骨
寒溜萬瓦冰垂鬚道人凍餓山之麓暮爇松明煮溪綠
山陰孤棹期不來夢入幽巖聞折竹征西將軍持短兵
馳馬夜渡黃河冰關東諸將面欲裂嚴光獨釣桐江雪

春日行

東風入樹吹流鶯曉窗隔霧花冥冥美人窗間動曉思
鶯聲枕上啼春晴塵中日出花滿城城南春深楊柳青
王孫不歸消息斷深閨無人春草生草生猶有時王孫
何日歸斜陽照流水萬里長相思東園三月花爛開西
鄰蝴蝶雙飛來明朝蝶去春無主閉門花落愁如雨

張雨

奔月卮歌荅鐵崖所作

甕社明珠奔入月脫殼政似風蟬潔漁網出之不敢視
滌盡含沙光不滅文昌四星吞在腹一一金晶大如粟
蜃物還來作飲器日夜雄雌繞林屋一扇桃核寬有餘
半葉蕉心卷未舒飲非其人躍入水怪雨盲風生坐隅

置之天上白玉盤斗柄挹酒長闌干李白跳下鯨魚背
持勸我飲相交歡幽宮馮夷為予泣酌盡海水百怪出
還我平生老蚌胎許君醉卧鮫人室

玉笙謠為鐵門笙伶周奇賦

我有紫霞想愛聞白玉笙懸匏比竹無靈氣昆丘採此
十二莖鳳咮銜明珠鳳翼排素翎金華周郎妙宮徵子
晉仙人初教成月下吹參差羣雛亦和鳴緱氏山頭白
雲起七月七日來相迎長謝時人一揮手飄下滿空鸞
鶴聲

效隱居擬古樂府寒夜愁

夜寒生羣獸驚寂兮寥兮棲遁情陰宮漫漫落葉平岡

御選元言 卷二
頭霜月弄微明寒漏澀寒絃緊愁腸結愁語盡人生異
木石思來誰能忍

湖州竹枝詞

臨湖門外吳儂家郎若閒時來喫茶黃土築牆茅蓋屋
門前一樹紫荊花

桂枝詞

桂樹叢生枝婀娜糝粟黃雲欲成朶薰醒秋衣懶下牀
金蟾嚙斷燒香鎖

古意

吳綾光纏纏織成鯨掉尾美人不敢裁恐觸波浪起
明德游仙詞十首用天柱山傳來依韻繼作雲

林道氣者觀之亦足自拔於埃壒矣

錄六首

白玉之盤滄海東蒼蒼下視遠如空請看端正山河影
不滿均堂杯水中

夜久扶桑海色分珠宮望拜赤龍君洞庭未省君山在
元是崑崙一朵雲

右股清池足漚麻池中肥水是松花早知魏帝一丸藥
肯信東門五色瓜

恥作深山服食仙伐毛洗髓故依然木蘭墜露研朱寫
只寫南華秋水篇

脚底琴生三尺鯉袖中阿母一雙桃別時身動凌波鞵
爛月如銀照夜濤

御選元言卷二
玉格金科自有期赤城何待遠尋師壁梭也解為龍去
樵斧如何只看棋

富恕

西湖竹枝詞

十里荷花錦一機雨餘荷氣撲人衣滿船游女蒙白苧
陣陣腥風鷗鷺飛

于立

漁莊款乃歌

芙蓉千樹齊臨水橘柚滿林都是霜飲罷玉人歸別院
只留明月照漁莊

對酒清歌窈窕娘持杯勸客手生香袖中藏得雙頭橘

一半青青一半黃

烏夜啼送朱長元赴膠州同知

城頭烏夜啼還過上林棲上林高樹多好枝歸飛啞啞
東復西起看江月沈江底使君遠遊中夜起軟紅陌上
踏青陽快馬猶龍車似水烏夜啼啼送君驅車出門風
欲薰東方日出如車輪

道英

對山曲

青山作賓翁作主山翁持觴山鶴舞山翁對山傾綠醕
青山對翁默無語山本無情翁無心青山不飲翁自斟
酒闌對山撫掌笑山鶴一聲山月沈

秋夜曲

西風不起凝空碧
霜花霏霏炯秋色
層霄輾上玉一輪
竹影參差光欲滴
洞房深寂湘簟寒
夢回孤枕疎漏傳
雁聲低度吳天遠
素壁青燈瑤穗斷
隔雲聽徹五更鐘
鴛鴦屏冷初日紅

希陵

送人歸山中歌

青山兮欲歸不可得
兮褰衣駕元豹兮
駿赤狸雲冥冥
兮風飛獨偃蹇兮
世路寧容與兮
溪湄泉涓涓兮
石齒齒君不歸兮
何為

秋夜長

秋蟲嘖嘖寒莎底
城頭秋月白如水
二十五點秋夜長
點點滴斷離人腸
萬里一身風露涼
家家秋砧搗衣忙

明本

田歌

邨南村北春水鳴
村村布穀催春耕
手捧飯盂向天祝
明日插秧還我晴

與恭

天台石橋歌

五百人兮山之中
驅白虎兮騎蒼龍
袈裟兮襟縷頭髮
今蓬鬆神怪萬狀
兮吾不得而窮望
歸來兮庭之幃燒
香瀾茗兮鐘鼓交
搥不見來兮勞思
坐蒸餅子淚垂汝

將舍我兮而何之

行端

思洞庭寄承天寺覺菴老師

煙蒼蒼濤茫茫洞庭遙遙天一方上有七十二朶之青
芙蓉下有三萬六千頃之白銀漿中有美人兮佩服金
鴛鴦游龍車鳴月璫直與造化參翱翔憶昔天風吹我
登其堂飲我以金莖八月之沆瀣食我以崑丘五色之
琳瑯換爾精髓滌爾肝腸灑然心地常清涼非獨可以
眇四極輕八荒抑且可以老萬古凋三光久不見兮空
慨慷久不見兮空慨慷

清瑛

山居吟

滿山筍蕨滿園茶一樹紅花間白花大抵四時春最好
就中尤好是山家

茅屋低低三兩間團團環繞盡青山竹牀不許閒雲宿
日未斜時便掩關

山形凹凸路高低石占雲頭屋占蹊地窄栽來蔬菜少
又營小圃在橋西

移家深入亂峰西煙樹重重隔遠溪年老心閒貪睡穩
厭聞鐘響與雞啼

半窗斜日冷生光破衲蒙頭坐竹牀枯葉滿鑪燒焰火
不知屋上有寒霜

深秋時節雨霏霏
蘚葉層層印虎蹄
一夜西風吹不住
曉來黃葉與階齊
老來無事干懷抱
竹榻高眠石枕斜
夢裏不知誰是我
覺來新月到梅花
獨坐窮心寂杳冥
个中無法可當情
西風吹盡擁門葉
留得空階與月明

覺恩

甘菊歎

手栽甘菊巖之阿
一十一莖為一窠
當暑不灌亦不摘
自然生意成婆娑
頗怪秋來風雨橫
枝條滿地根鬚迸
青蟲食葉還食心
小草閒花出頭上
林間一夜清霜飛

蟲死草枯惟菊枝
黃金錯莫看愈好
三嗅馨香徒自悲

元鼎

方寸鐵歌贈伯盛朱隱君

人心何危患多岐
方寸之鐵貴自持
百鍊耿耿明秋暉
彼柔繞指何詭隨
朱盛剛勁真吳兒
法書鐵畫逼秦斯
晴窗握管儼若思
學成變法出愈奇
鐵耕代筆猶神錐
用之切玉如切泥
孤忠不媿月食詩
清便更賦楊花詞
元祐黨碑我所非
驢鳴犬吠我所嗤
雕蟲小技同兒嬉
屠龍妙割嗟奚為
盛乎盛乎知不知
南北車書滾滾來
中興定勒磨崖碑
大書深刻非子誰

文信

和西湖竹枝詞

湖西日脚欲沒山湖東月出牙梳彎南北兩峰船上看
恰似阿儂雙髻鬢
湖上采菱菱濕衣泥中取藕藕得歸怪殺鴛鴦不獨宿
却嫌鷓鴣傍人飛
蹙金麒麟雙髻丫白銀作甲彈琵琶何曾辛苦事蠶織
水口紅船長是家
東邊高樓紅紫開西邊青山翠成堆吳兒蕩漿浪花裏
相賽唱歌船去來

照

和西湖竹枝詞

日日采蓮湖水濱湖中白日照青春東風吹雨過湖去
江花愁殺未歸人

超珍

漁莊款乃歌

繡戶芸窗八面開漁莊酒色淨如苔鯉魚三尺丹砂尾
聽得清歌出水來
雨後芙蓉霜後楓漁莊只在畫橋東不知前面花多少
映水殘霞爛漫紅

壽寧

洞雲操

火流空兮折荆枝塵漲天兮箠不可支依我洞兮綠下

御選元言 卷十一
垂緼我綠綺兮操青霞以爲辭
華山兮希夷吾與汝兮
來歸

椿

和西湖竹枝詞

放船早出裏湖邊
阿儂唱歌郎蹋船
唱得望湖太平曲
共郎長樂太平年

良震

和西湖竹枝詞

六月七月生晚涼
大樹小樹臨幽窗
枯槎行蟻過無數
晴空好鳥飛一雙

日日淨圭

游仙詞

霞光閃閃五雲東
樓觀巍巍照碧空
忽報夜池催賜宴
翠鸞飛景月明中
縹緲仙山五色雲
玉真飛佩度氤氳
不應名字題仙籍
猶看唐家舊賜裙

洞草巖花處處春
壺中日月鏡中身
飈輪飛度麟洲水
知是仙班第一人

松飄金粉落空庭
石上清齋玩易經
應笑世人工肉食
滿頭垂白采參苓

塵寰擾擾事如麻
恨我東風易落花
阿母蟠桃才一熟
人間幾度摘秋瓜

御選元言

卷十一

淨圭

宗衍

三

瓊樓十二亞相連樓上仙姝笑粲然青鳥忽煩將遠意
紫霞新寫寄來篇

青童小隊鼓琅璈仙子酣歌詠碧桃下視人寰方洵洵
紅塵如海漲波濤

青鳥銜書降玉京芙蓉金掌露華清深宮無限情緣在
不是神仙不易成

宗衍

野雞毛羽好

野雞毛羽好不如家雞能報曉新人美如花不如舊人
能績麻績麻作衫郎得著郎見花開又花落

惟則

篳篥引 并序

西瑛懶雲窩距余禪室半里許時相過從吹篳篥
以為供復於余言有所需乃賦長歌以贈

西瑛為我吹篳篥發我十年夢相憶錢塘月夜鳳凰山
曾聽酸齋吹鐵笛初吹一曲江風生餘響入樹秋嗚咽

再吹一曲江湖未歸客歡者狂歌繞樹行悲者垂頭淚沾膝
半是江湖未歸客歡者狂歌繞樹行悲者垂頭淚沾膝

我時奪却酸齋笛斂襟共坐松根石脫略悲歡萬念消
悟聲無性聞無跡西瑛篳篥且莫吹篳篥從古稱悲栗

悲歡茫茫塞天地人情所感無今昔山僧尚賴雙耳頑
請為西瑛吐胸臆聲聞相觸妄情生聞盡聲亡情自釋

御選元言 卷十一
盡聞莫謂聞無聲機動籟鳴無間隔亡聲莫謂聲無聞
去來歷歷明喧寂吹者之妙余莫知聞者之悟公莫測
公歸宴坐嬾雲窩心空自有真消息

善學

山趣吟

我趣山幽逸山幽豈易言但容來老衲未許過高軒泉
眼山邊活鳥聲花外喧紅塵無路入風景似桃源

西遊山宇吟

菴鎖雲巒樹鎖煙淡濃蒼翠筆難傳石邊添箇頭陀坐
一幅丹青世外懸

山雲水石道人方寸常開不夜花風味與人真箇異

夜深撥火自烹茶

掃石跏趺默坐間春深幽鳥亂啼山白雲愛我菴前住
與我常年共放閒

大圭

和詹生春雨寒歌

十日春九日雨空屋貯寒寒色苦曉雪都成陌上泥暮
雲不見城東樹所思今何處相去纔幾許獨將寸心寄
短琴琴老無絃暗塵土東風吹落錦一幅文章字字成
金玉中有苦寒詞詞古聲更悲賡歌我不忍上訴蒼蒼
知俗眼瞳人久生脂競收瑣尾遺瑰奇野禽乘軒士徒
步黃土被繡人無衣天公有意回春燠千林一夜生紅

綠長年呻吟卧掩門人生不解同草木君勿歌春雨寒
我有兩耳愁心百盤爐空葉已灰屋漏苔生椽檐聲夜
夜春水懸人間惟我與子同此味鬢髮未白書如山春
雨寒歌一闕窮達在天愁不得當時短衣夜半悲飯牛
何如學取商頌聲金石

魏國夫人管氏

漁父詞

南望吳興路四千幾時回去零溪邊名與利付之天笑
把漁竿上畫船
身在燕山近帝居歸心日夜憶東吳斟美酒膾新魚消
却清閑總不如

人生貴極是王侯浮利浮名不自由爭得似一扁舟弄
月吟風歸去休

鄭氏允端

吳人嫁女詞

種花莫種官路傍嫁女莫嫁諸侯王種花官路人取將
嫁女王侯不久長花落色衰情變更離鸞破鏡終分張
不如嫁與田舍郎白首相看不下堂

擬寄衣曲

男兒遠向交河道鐵馬金戈事征討邊頭八月霜風寒
欲寄戎衣須趁早急杵清砧擣夜深玉織銅斗熨貼平
裁縫製就衣襖裙千針萬線始得成封裏重重寄邊使

為語夫君奮忠義好將功業立邊陲要使聲名垂史記
余季女

遣興歌

妾誰怨兮薄命一氣所神兮化生若甌春山媚兮秋水
淨秉貞潔兮妾之性聊歌兮遣興

夜夢兮食梨命靈氛兮與予占之曰行道兮遲遲斂角
枕兮粲如風動帷兮心悲

雲黯黯兮雪飛棘夫子介兮如石苦復留兮不得望平
原兮太息涕泗橫兮沾臆

送子去兮春樹青望子來兮秋樹零樹有枝兮枝有英
我胡為兮煢煢子在此兮山城

織女兮牛郎星回紀兮為參商欲徑渡兮河無梁霜露
侵襲兮病偃在牀嗟嗟夫子兮誰與縫裳

士女曹妙清

西湖竹枝詞

美人絕似董嬌嬈家住南山第一橋不肯隨人過湖去
月明夜夜自吹簫

士女張妙靜

西湖竹枝詞

憶把明珠買妾時妾起梳頭郎畫眉郎今何處妾獨在
怕見花開雙蝶飛

薛氏蘭英蕙英

蘇臺竹枝詞

姑蘇臺上月團團
姑蘇臺下水潺潺
月落西邊有時出
水流東去幾時還
館娃宮中麋鹿遊
西施去泛五湖舟
香魂玉骨歸何處
不及真孃葬虎丘
虎丘山上塔層層
靜夜分明見佛燈
約伴燒香寺中去
自將釵釧施山僧
門泊東吳萬里船
烏啼月落水如煙
寒山寺裏鐘聲早
漁水江風惱客眠
洞庭餘柑三寸黃
笠澤銀魚一尺長
東南佳味人知少
玉食無由進上方

荻芽抽筍棟花開
不見河豚石首來
早起腥風滿城市
郎從海口販鮮回

楊柳青青楊柳黃
青黃變色過年光
妾似柳絲易憔悴
郎如柳絮太顛狂
翡翠雙飛不待呼
鴛鴦並宿幾曾孤
生憎寶帶橋頭水
半入吳江半太湖

一縞鳳髻綠如雲
八字牙梳白似銀
斜倚朱門翹首立
往來多少斷腸人
百尺高樓倚碧天
闌干曲曲畫屏連
儂家自有蘇臺曲
不去西湖唱采蓮

徐氏女

途中怨

萬水千山去路賒青鞵踏破幾層沙登山絕頂重逢嶺
渡水尤深又復涯雁字只傳夫與子魚書難寄母和爺
回頭遙望鄉關處雲下峰前是我家

鄭奎妻

春詞

春風吹花落紅雪楊柳陰濃啼百舌東家蝴蝶西家飛
前歲櫻桃今歲結鞦韆蹴罷鬢髮粉汗凝香沁綠紗
侍女亦知心內事銀瓶汲水煮新茶

夏詞

芭蕉葉展青鸞尾萱草花含金鳳嘴一雙乳燕出雕梁

數點新荷浮綠水困人天氣日長時針線慵拈午漏遲
起向石榴陰畔立戲將梅子打鶯兒

秋詞

鐵馬聲喧風力緊雪窗夢破鴛鴦枕玉爐燒麝有餘香
羅扇撲螢無定影洞簫一曲是誰家河漢西流月半斜
要染纖纖紅指甲金盤夜搗鳳仙花

冬詞

山茶花開梅半吐風動簾旌雪花舞金盤冒冷望狻猊
繡幙圍春護鸚鵡倩人呵筆畫雙眉脂水凝寒上臉遲
妝罷扶頭重照鏡鳳釵斜壓瑞香枝

張氏

寄外兄弟二首

山之高兮月出小月之小兮何皎皎
我有所思在遠道
一日不見兮我心悄悄
采苦采苦于山之南
忡忡憂心其何以堪

無名氏

和楊鐵崖西湖竹枝詞

蘇公堤上楊柳青
人來人去管離情
東風為爾丁寧道
折斷柔條莫再生

天竺寺前開翠微
長年流水白雲飛
流水入湖無日歇
白雲出岫有時歸

櫻桃詞

江南四月春歸早
紅紫千枝迹如掃
枝頭新綴纓絡珠
一樹櫻桃爛晴昊
菱花照見白家娘
一顆胭脂相鬪好
青樓遠客迷芳草
三食櫻桃送春老
鳳皇在何方
銜將飛遠道

雪花曲

苦篁獵獵吹北風
黃河水流凝不通
天孫手持白鸞尾
笑掃琪花飛碧空
崑山玉碎瓊樓裂
老龍起舞驚明月
夢覺游魂不覺寒
醉吟紙帳春雲熱
東家嬌娘厭桃李
學繡宮花瑣窗裏
冷袖擎來欲細觀
隔簾火氣催成水

劉妙容

伊州曲

月既明西軒琴復清寸心斗酒爭芳夜千秋萬歲同此
情歌宛轉宛轉聲已哀願為星與漢光景共徘徊悲且
傷參差淚成行低紅掩翠方無色金徽玉軫為誰鏘歌
宛轉宛轉結復悲願為煙與霧氤氳共容姿

御選元詩卷第十一

齊武帝

青艸長春草三春綠
一樹野林暎朝日
雲南四月春猶早
珠箔千絲並吹舞
林頭薄霧
雲南四月春猶早
珠箔千絲並吹舞
林頭薄霧
雲南四月春猶早
珠箔千絲並吹舞
林頭薄霧

御選元詩卷第十二目錄

五言古詩一

耶律楚材一首

郝經二十一首

劉祁三首

姚樞十首

許衡四首

王磐二首

劉因二十八首

劉宣一首

胡祇適一首

王暉十一首

王旭一首

宋渤三首

程鉅夫七首

夾谷之奇一首

苟宗道一首

元淮二首

方回九首

御選元詩卷第十二目錄

御選元詩卷第十二

五言古詩一

耶律楚材

過濟源和香山居士韻

覃懷勝遊地濟瀆垂名久忽見樂天吟笑我輸先手麗

詞金玉振老筆風雷走乘興試續貂啓我談天口平湖

湧泉注清涼瑩無垢憑檻瞰連漪風髯塵抖擻龍孫十

萬竿翳翳濃陰厚沁水濟源東天壇王屋右秀色已可

餐何須杜康酒步步總堪詩佳篇如素有賡酬淡相對

獨有龍岡叟亭上幾徘徊斜陽西入酉晚年歸意切對

此空沉首何日遂初心營居碧林後

郝經

雁媒

雲衢眇飛鴻往來解隨陽序當夜有所次進朝有行瀚
 海天山西卯育歲為常八月秋風高雖雖共南翔水國
 足汀洲江湖多稻梁晡帶殘蘆老岸青草長哀鳴洞
 庭月亂點瀟湘霜太和開冰天北去頑穹蒼信禽法天
 運斷不為炎涼偶為篝燈誤縛足離江鄉飲啄養為媒
 朋儔總相忘嗷嗷解愁人乃反無愁腸弋人見冥鴻矰
 繳潛施張置媒使號呼投網來搶攘奄忽一舉盡羽毛
 皆摧戕厭然束縛去又向雲間望嗟嗟罔民徒詭計不
 可防被獲反為用竭力如鬼俵有信復無智終自為身

殃誤已更誤人不悟真可傷

遊靈巖寺

并序

乙卯秋九月十九日登泰山二十二日下太平頂

遂遊靈巖寺

岱宗西北馳倒卷碧玉環嶽靈祕雄麗勢欲藏三山初
 從谷口入兩崦爭孱顏漸疑下地底細路深屈盤仰視
 覺天窄石井攢峰巒陸海沙劫開突兀仁王壇桐鯨吼
 西風棟宇橫高寒石龍噴清泉灑落几案間脩竹埽山
 色瑩綠穿雲根丹鳳飢不來寂莫青琅玕上方在天上
 下視無塵寰空霏鎖霜樹翠錦蒙朱殷西日回清輝輕
 金滿煙鬟何時脫世網挂席高盤桓靜境求初心滯慮

從選元言 卷十一
驅萬端向晚蒼煙合更欲窮躋攀路斷不得前矯首重
一看

贈青社諸公

北風吹海氛雄鯨偃脩鰭皇皇擇木鳥落日將安之清
霜摧豐林枯沙沒卑枝况復天地閉豈汝飛騰時嗷嗷
復嗷嗷途窮愈多岐寸心增鬱陶拊髀潛生悲蒼茫欲
問津謾使行人嗤賴有魯連子亦在東海湄舉手謝浮
世共欲尋安期扶搖三山巔笑傲雲濤低半夜開扶桑
弄日騰清輝伊昔孔尼父亦欲居九夷世網儻可逃去
去夫何疑

渡江書所見

并序

已未秋奉命宣撫江淮自鄧南入新野蹈宋北鄙
渡泌河及湖陽入於春陵陂塘聯絡畎澮縈屬邨
墟翳翳荒空不可行佳木修竹奇花異卉櫛比林
莽間怵然有感於中而取野蓮荒竹秋桐野菊四
者姑以寓感焉

野蓮

陂塘渺煙蕪秋波淡浮空蒹葭雜芙蓉依稀見愁紅輕
鎖露華涼亭亭倚西風金粉亦自香霞腴爲誰容無言
恨最深失偶情更濃搖搖似相招爲喜詩人逢翻思彼
桃李反在羅綺中復憶巖下蘭綠葉翳荒叢西子出苧
蘿原思老蒿蓬萬物在生處莫謾仇天公

荒竹

荒竹遶廢宅高下隨女蘿新梢入林莽迸葉揚條柯玉骨清且癯埋沒還奄阿病綠煙慘悽枯黃雨滂沱劍斷戟復折壯士空悲歌伊昔主家安森森氣相摩籜龍起雲雷平地煙霄過幽香澹庭除靜陰延綺羅一自兵塵生人去斤斧多寂寞秋不實飢鳳將奈何

秋桐

高秋江漢波卉木入搖落荒林擁孤桐蔓草重繞縛淒迷氣日喪憔悴若隕籜黃彫晚風吹青裂飢鳥啄無時亦無儔幢幢老陰薄儀鳳安所棲宮樹空寂寞謂汝無自傷植根亦嬌弱豈能持風寒况乃失所託何時此焉

居揚鋤翦荒惡攜幼扳庭柯遂我生聚樂

野菊

乾坤入消數萬物呈晚節秋晏菊始華荒叢翳林樾野迴幽姿清岡斷寒豔接絲蟲胃青苞啼蜚抱枯葉灑露積玉華層層擁金屑我欲摘以杯飲之濯中熱霜栽郁高標胡與荒穢列嗟爾夷惠儔玉質難變滅不謂無人看便使幽香歇安得老瓦盆坐對澆古月

橄欖 南人謂之格覽

南果足韻勝北人罕為奇銀盤獻青子愛玩驚見之蓮房飽出螭棗滑生下枝翠粉苔埒新清烈凝松脂齒牙噴艱澀苦硬不可持氣韻久始來靈根淪天池灑然凌

清飈甘露濡仙芝有如宿瘤妻苦節真可期亦如相韓
休朕瘠天下肥危辭遽逆耳終自爲良規先難阻欲速
後得卒莫違默默心語口此樂夫誰知始覺衆果俗橘
奴復梨兒海嶼出乳泉造化亦若茲元氣舌本甜酸苦歸
不可滋島嶼出乳泉造化亦若茲元氣舌本甜酸苦歸
涕洟本來甘受和衆味相假移居然復其源僞妄焉能
欺何當謝世網兀坐忘奔追深山石室空煮石療調飢
破鼎煎春芽嚼此吟湘纍脩然沃肺肝看山坐支頤物
表有真味載歌采薇詩

秋思四首

錄二首

木葉墮積水西風白雁來祇應破月底曾過黃金臺昔

年弔荆卿臺邊把酒盃落日督亢陂莽蒼秋雲開浩歌
易水寒晚山青崔嵬誰知坐江館兩見飛鴻回空庭日
徙倚慘淡生莓苔援溺先隋井計拙良可哀

昔遊東諸侯秋晚登泰山佇立太平頂超然出塵寰日
觀望吳越浩渺秋雲間長風漾江海天末生微瀾今年
坐舍館江聲滿重關却如在幽陵修阻不得看好花靜
有色相對婉且閑無由寫哀怨日遶歌幽蘭

儀真館後園海棠兩花於秋因爲小酌賦詩

二年海棠秋幽妍對寥索霜後輒載花枯株吐纖弱化
工爲詩人故令造物錯木落出奇芬風度亦不惡尖黃
簇短葉膩翠光欲爍蹙縮包紅粟殷濃入深萼稀疎生

意怯靜麗尤綽約飛絲罥青蟲蠨蛸共聯絡深閨養春
嬌霜華滿珠箔賴得西風輕微薰小陰作盈盈出宮妝
新寒翠綃薄空庭自顏色含恨誰附著息亡楚無言意
婉心不樂琵琶怨昭陽所遇非所託獨有未歸人相看
慰孤酌却似海南時坡仙政漂泊有酒仍有花世事且
高閣後時亦何遲適寓今猶昨香霧霑新橙傾酒兩螯
嚼銀燭更高燒秋花易零落

甲子歲後園秋色四首

雞冠

夷則播新律卉木協秋候綰結流火餘的皪金天宿
我列庭除摘摘儼雄秀炎帝朝火官絳幘軒宇宙植立

竟不拜離披擁青袖奕葉初類莧吐心漸如豆脉絡引
絲起一片珊瑚瘦雲芝茁紅腴紫茵卷翠脰碎顆蹙丹
砂肉綻殷血透怒割赤龍耳勁磔還亂糝麻葉薄且聳
山字缺仍覆查牙欲成角擁腫下連珠生全餘小穗展
盡帶殘皺昂藏偃膺高突兀出羣驟還將早霞映欲向
朝日雖月露終夜棲風雨幾回闔再礪復自止交退誰
與救區區閑草花象物與接構弭兵日觀戰亦是自貽
咎垂簾且相忘高枕臥清晝

牽牛

野花照天星星中花亦盛長夏蔓草深疎籬掩斜徑幽
庭日無事森寂澹相映繚繞絲亂垂點綴葉相並金風

一披拂零露光彩競參差碧玉簪縮插滑欲迸霜絲吐
冰同容色好娟淨堂陰青錦張牆背紫苔瑩時方鵲橋
成佳節當秋孟織女能剪裁天河洗尤稱女以秋爲期
郎將花作證風雨開雲屏鸞凰鏘月鏡處處乞巧筵家
家喜相慶五年江館客萬事成隋甌不能致龍節空自
悲虎穿永日麈炎蒸中暑甘臥病對花淚盈目坐起不
覺暝雲漢見雙星回頭看斗柄遙憐小兒女昏嫁俱未
竟中流虞風波相見何日更

葡萄

深院荒草長短蔓裂塼縫葡萄本西果南國誰與種插
蘆爲扶持灌溉甚珍重瘦骨紫節舒龍頭青線控蟠蟠

上疎籬萋萋將遠縱遭遇雖後時取實望秋仲摘露添
俎豆庶閒館人供誰知六月旱卉木焦死衆斷秧餘幾
花強勉著土擁竟作纏結枯日遶空悼痛肺渴口重乾
望梅心欲烘忽憶河隴秋滿地無歇空支離半空架串
草十里洞拇乳積成岸瀕濃接梁棟一派瑪瑙漿傾注
百千甕往歲見沙陀回鶻正來貢詔賜琥珀心雪盛瓶
盡凍查牙飲流澌氣壓黑馬潼一旦離魏闕五載猶在
宋見此復何時烏道目逆送

野蓼

窈池蓮蒲短久旱餘淺淤牆隈積餘埃玉鳳秋不翥野
蓼根莖堅幸得侵沮洳節葉瘦且赤靡蕪交翠箸細蕊

亦鮮潔粉米糝丹素獨宰裊輕穗離披滴清露水花澹
晚色幽窅足真趣忽憶過夢澤千里渺煙樹蘆花與蓼
花露錦蕩雪絮深入芙蓉藪遠映蒹葭渡舉鞭問飛鴻
駐馬嚼佳句乃今四壁中浩渺隔煙霧日斜對幽叢聊
以慰遲暮大似辛苦蟲無復風標鷺來因援沉溺底事
極幽錮屢上剗腸書無地瀝血訴嗟嗟好花草焉用生
此處祇因爲詩人故故獨不去嘗膽如啖蔗食蓼猶饒
御仰首但有天志節久愈著

幽思六首

江山鬱幽思靜止有天光宛然褰薄帷明月照我牀蟋
蟀鳴孤根鴻雁頽飛霜怒怒動羈衷耿耿發清狂有萬

來無端百折縈回腸晤言且伏枕一寐成兩忘
鸞凰翥丹霜尺鷃捨枯株知止各翱翔卑高一何殊精
衛苦填海冤憤一何愚鳴鳩不爲巢亦自有所居偉哉
衡門士高臥一束書曲肱有餘樂不用長者車
濯纓厭世塵入海求夜光貝闕涵珠宮異色森綺芒采
采滿懷袖駕龍登扶桑赤烏驚上天火曜舒乾陽回視
乃瓦礫自媿空犇忙書生莫謾愚弊帚安足藏
有物莫不由萬古長安道區區往來者總向塵中老年
年雨灑清日日風驅埽行人竟無迹涸轍生秋草我欲
謝帝闈離居事幽討束載無良辰幾回問蒼昊
藏舟泰山巔偶值懷襄流忽從歸墟東直向西海頭洗

日復濯月光抱空中樓扶疎散青紅異氣纏九州忽焉
閣寒沙佇立令人愁明朝早潮來欲往不得留
景晏念慮歇支頤坐看山起來復何為結佩紉幽蘭萬
事從悠悠不媿俯仰間舉杯謝塵世月落梅花殘深江
總風波天澹孤鳥閑氣數當閉塞我亦方閉關

劉祁

古意二首

庭前有桂樹綠葉尚離披秋風動地起飄落將安歸高
飛入青雲下飛入汙泥貴賤既偶爾孰為喜與悲
秋江有芙蓉顏色好鮮潔褰裳欲采折水深不可涉嚴
風下飛霜芳豔空凋歇悵望一長歎臨川無桂檝

送雷伯威

朔風起天末落木鳴空山冰霜正凝沍遊子百里還出
郭送將別徘徊上高原如何睽離情對此芳歲闌壯士
志四方不須涕洟瀾人生非山海會面亦不難願子崇
明德餘功振文翰長因東南鴻惠我金玉言

姚樞

聰仲晦古意二十一首愛而和之仍次其韻

錄十首

聖聖繼天極授受惟一中宣尼集大成玉振條理終盡
性無思勉中道何從容乾坤有全德尚資參贊功
韋編日三絕孳孳何所嗜人道合天心天人本無二盈
虛消息幾進退存亡事何當擬虛元百世老輔嗣

御選元言 卷十一 九
觀人莫觀貌相馬不相肉羣經無釋辭熟讀意自足易
道微九師春秋散公穀古今有成言此論非余獨
高明懸萬象經緯成縱橫君子動靜機一以蹤天行後
來英偉士槩舉名書生胡為事無用篆刻風物情
任重不易勝無為鼎折足小利害成事不達緣欲速閉
戶豈遺世入仕非干祿出處貴適時違時招自辱
夷齊顧名節不食餓首陽尚父應天討奮時清渭傍心
跡異天壤日月同輝光道義有如此人惟重行藏
志士慕功業富貴鴻毛輕仁人懷道義不為功業縈富
貴詎可求功業從自生狂狷奚所取無由見中行
有士氣凌雲孤松挺高節壯懷入酣歌歌長擊壺缺鬢

髮日以秋肝腸老於鐵從知養浩然此意潛消歇
拔茅連其茹激濁揚其清雲山興大厦諒非一木成巖
嶷萬斛舟水積舟乃行羣材惟柱石國勢何用傾
天道有定常推行無少忒人心復何為遷變莫能測古
人貴全交所貴在恒德黃金百煉餘不改當時色

許衡

遊黃華

我生愛林泉俗事常鞅掌十年苦煩劇一念愈傾仰峰
巒看畫圖雲煙入想像久成心上癖欲忍不可強荷有
敬齋公恒以善相長攜我遊黃華一洗塵慮爽行行歎
奇絕舉目皆勝賞鏡臺聳百嶮瀑布落千丈石苔積重

徐運元言 卷二 十一
痕溪風動幽響使我躁競息使我心志廣恍如夢中身
翱翔千古上回首聲利場誰能脫塵網我老得仁心動
作皆可像還家擬鄰居求田冀接壤便許樸鈍質於此
靜中養

送竇清淑

初來識君面此行見君心
宦時有長策慮遠憂且深
俗情取近效雅意入幽沈
人生貴所依所依貴知音
知音得長布身將比黃金
我本貧賤士多思委相尋
未得辦一飯胡爲遽分襟
征鴻出遠塞西風動疎林
去去渺萬里何年酒同斟
含情望無極白雲障孤岑

別西山二首

大山如蹲龍小山如踞虎
煙嵐鬱蒼翠遠近互吞吐
我來蘇門居遨遊成樂土
策杖望朝雲捲簾看暮雨
佳意豁塵腥勝槩入談麈
使我鬱陶消使我勞瘵愈
生平鄙吝心一洗出千古
回首聲名人何殊坐圜遠
役非素懷况有跋涉苦
吟鞭裊春風遲遲如去魯
芳菲二三月追遊盛梅塢
歸來願無違一觴相對舉
木喻今茲重盤我愛林慮
山不處要路津茲焉幾千
古絕彼朝市塵我來成素
交澹澹日益親形骸兩相
忘誰主復誰賓充然樂我
飢怡然棲我神朝光連暮
色佳意含餘春心境一融
會世味殊未真奕奕草木
光熙熙禽鳥馴衆物欣有
託吾廬行亦新詩書詠而
歸况有耆德鄰

王磐

林慮著太行峰巒一都會晴嵐照郭郭朝日炫金翠盤
盤黃華山高秀衆峰內萬仞青芙蓉屹立見根帶有泉
不知源滂沛落雲際初疑玉虹垂兼訝銀河潰翻翻雪
練飛洶洶風雷沸前年會一遊披覽恨未細今茲重經
過適與佳客萃坐分石上苔行並林間轡緬懷雪溪老
遠出遼海外飛聲入中華遂占此山麗吾家墨竈峰卑
小衆所易婆娑百本松龍蛇護清閼煙雨一窗書作我
幽棲地會看此名山永無黃華配江山無大小玩賞因
人貴嗟我復何人題詩聊自戲

崑崙山

昨日遊黃華抵暮方言還今晨到崑崙驅馬五松邊未
移金門日還指元康煙山中富清境不暇相周旋大似
山陰客望門却迴船空懷上方寺矯首浮雲顛瀑布落
晴雪金燈開夜蓮何當重經過巖下細留連

劉因

韓魏公祠

定州古北門作鎮多英奇如何郡學傍獨有韓公碑乾
坤極厚大運物物不知堂堂宋三朝斡旋公似之惟公
元默間泰山已四維天宇公之祠元氣非公誰郡人一
何愚而於公欲私大者且勿論緒餘猶世師千年閱古

堂誰歌鄭國詩

公闕古堂
富公有詩

裴回老柏前目送秋鶴飛悠悠

五色雲悵望今何歸

仙臺

碣石來海際西南奄全燕中有學仙臺燕平欲昇天燕
平骨已朽遺臺猶相傳雖復生青松歲久摧為煙極目
望海波不見三山巔三山巨鼇簪山人蟣蝨然使無不
足論信有亦可憐大塊如洪鑪金石能久堅天地會有
盡何物為神仙空山無笙鶴落日下飢鳶今古非一臺
浩歎秋風前

黃金臺

燕山不改色易水無新聲誰知數尺臺中有萬古情區

區後世人猶愛黃金名黃金亦何物能為賢重輕德輝
照九仞鳳鳥才一鳴伊誰腐鼠棄坐見飢鳶爭周道日
東漸二老皆西行養民以致賢王業自此成黃金與山
平不救兵縱橫落日下荒臺山水有餘清

張燕公讀書堂

陰壁下寒泉陽崖隱深洞想像張幽州當年此絃誦遐
情納方寸灑露驚宵夢既有真積功豈無致時用不然
起絕學猶當垂後統濟濟唐開元儒臣相伯仲文雖數
燕許名不並姚宋遂令百世下煙霞抱餘痛尋幽縱步
貪懷古清歌送緬思白鹿翁眼中見連棟茲山有道氣
會遇或天縱聊以永今朝白雲不可種

盤磴脫交蔭平壇得高岑高岑不可攀哀湍激幽音窮
源豈不得爽氣來駸駸靈潤發山骨沮洳下崖陰爲問
石上苔妙理誰曾尋乾坤有乾溢此水無古今下有靈
物棲倒影毛髮森東州旱連歲呼龍動雲林顧此百丈
潭豈無三日霖爲霖此雖能鞭策由天心日暮碧雲合
空山深復深

經古城

我行常山尾高城下吾前按轡覽形勢依依見全燕易
水開前襟飛狐連右肩遙想豪傑場撫已增慨然薪人
過我傍一笑如相憐指城前問余考古今幾年沉思未

及荅行歌入蒼煙

孤雲

孤雲生幾時冉冉何所適豈無崑華高路遠嗟獨力徘
徊天中央明月爲顏色下有幽棲士歲晏倚青壁朝飲
澗下泉暮拂松間石相對澹忘情倒影寒潭碧

遊天城

逕遠澗隨曲崖深山漸少居然翠一城四壁立如埽天
設限仙凡雲生失昏曉平生萬事嬾登臨即輕矯山靈
知信息風煙久傾倒顧瞻困能仰泛應習稱好端居得
蕭寂遠眺礙孤峭乃知方寸間別有萬物表未須凌絕
頂曾次青已了

遊源泉

叢祠鬱蒼翠萬古藏清幽冷然石上足不逐蒼波流長
風索我御欲舉仍遲留白雲何山來相對亦悠悠
居然山四頽危檻俯晴春川氣生不極翠潤流衣巾林
陰起薄暮酒色生微醺歌聲忽落谷驚歸欲飛雲

隱仙谷

山川含太古風氣如未開中有幽棲人日暮斲蒼苔吾
曾素義皇人世不可諧此地復何地恍若登春臺山扃
掩對峙石逕迷縈回桑麻連水竹屋宇依山崖燕南避
世謠千古知我懷橫渠百世師一區竟相乖知音得元

老龍門有遺齋

伊川先生上文潞公求龍門菴地書略曰勝善上方舊址
荒廢為無用之地欲得葺幽居其上為避暑著書之所唐

王龜初書堂於西谷松齋之名傳之至今某雖不
才亦能為龍門添勝迹於後代為門下之美事 賤子孤旅人念此良悠

哉於世豈有望居山亦無媒舉杯對山靈欲去仍徘徊
他年要勝跡此駕當招來

遊雲水菴

乘春奮幽潛觀化登丘山哀淙聞遠壑息駕思雲關墾
石密松桂結屋珍茅菅生煙紛漠漠激流散潺潺山石
浮壽色澗木榮歡顏覽物有真意撫節驚循環悠然千
載情儼若盤石間眷焉欲晤語古人何當還

泛舟西溪

萬山倒滄浪一葉凌嵯峨嵯峨為飛舞翠影如婆娑輕

陰散雨足淨綠生圓波人間碧海幻老眼青銅磨風雲
幾千古辨此雨一蓑溪南有幽人鼓櫂前山阿煙深渺
無處月色浮松蘿

玉簪

堂陰秋氣集幽花獨清新臨風玉一簪含情待何人含
情不自展未展情更真徘徊明月光泛泛如相親因之
欲有託風驟渺冰輪

和陶

和飲酒

錄四首

凝冰得火力鬱鬱陽春姿寧滅不肯寒陽火如松枝詩
家有醇醪釀此松中奇一飲盡千山枯株彼何為所以

東坡翁偃蹇不可羈

士窮失常業治生誰有道身閑心自勞齒壯髮先老客
從東方來溫言慰枯槁生事仰小園分我瓜菜好指授
種藝方如獲連城寶他年買溪田共住青林表

吾宗幾中表訪我時一致自吾居此菴才得同兩醉逆
數百年間相會能幾次每會不盡歡親情安足貴所歡
在親情杯水亦多味

器飲代窪尊巢居化安宅凡今佚樂恩孰非聖神迹况
彼耕戰徒勤力有千百乞我一身閑坐看山雲白内省
吾何功停觴時自惜

和詠貧士

御選元言 卷二
陶翁本強族田園猶可依我惟一畝宅貯此明月輝翁
復隱於酒世外冥鴻飛我性如延年與衆不同歸孤危
正自念誰復慮寒飢努力歲云暮勿取賢者悲
爾實愀然中言而發違衆速尤迂風先驟
此淵明規頽延年語也見延年誄公文
獨正者危
至方則礙

四皓二首

智脫暴秦網義動英主顏鬚眉不得見猶思見南山每
當西去鴻目極天際還馬遷歌采薇託名夷齊間孰謂
紫芝曲能形此心閑鄙哉山林槁搏也或可班安得六
黃鵠五老相追攀一笑三千古浩蕩觀人寰
留侯在漢庭四老在南山不知高祖意但欲太子安一
讀鴻鵠歌令人心膽寒高飛橫四海牝雞生羽翰孺子

誠可教從容濟時艱平生無遺策此舉良可歎出處今
誤我惜哉不早還何必赤松子商洛非人間

吳山夜雪圖

江南無寒歲一雪今幾時吳山豈無春畫此寒巖姿壯
哉萬里流不廢東南馳胸中謾長風俛仰今古非誰能
唱小海為和大江詞
佳月靜可飲一天明水寒餘光泛不極徘徊尊俎間但
覺涼露下不知清夜闌醉眠吾有興君當下西山

書堂谷晏坐

上負青天壁下引碧澗滋中有晏坐石日夕忘吾歸永

御選元言 卷三
懷幽棲人千載誰與期人間九瀛海莽蒼天相圍黃塵
重如霧舉手不欲揮白雲如可招願作雙鶴飛

九日登洪崖

有道士居此今
二十年不睡矣

卑居不見秋登高自誰始清狂未免俗謹厚亦復爾山
光故相迎百步翠可倚屈指數勝遊茲山居食指高絕
讓龍門平敞亦專美羣山渺波鱗天開見洪水列岳真
情塵遐瞰小千里却恐行路人視予旋磨蟻解衣林表
坐爛摘蒲萄紫甘漿來逡巡毛骨脫泥滓勝境得真賞
泉石迴如洗况有幽棲人嗒然空隱几相對已忘言一
笑雲林喜回首暮煙深高歌望吾子非人間

遊龍宮

翠澗如生煙石瀨欲無雪縱目失平地仰面猶清樾時
節未當春生意方謀泄隨時久閉藏與物今超越茲遊
豈人力勝境殆天設拊石看棲龍髣髴仇池穴聞說如
桃源自古有深絕摳衣徑欲往不見當年轍獨立御長
風哀歌山石裂

九日攜諸生登西山

九日秋服成童冠從我遊萬古清沂春重結西山秋白
雲歸青岑狂瀾落滄洲永嘯長風來爽籟生巖幽清商
失搖落生氣浮林丘門生顧我言樂矣行歸休風袂尚
飄然此意浩難收

重遊北溪分韻得暉字

御選元言 卷十一
蒼黃淡野色草樹含清暉林居隱葱蒨晴嵐散霏微歸
雲有真意鳴禽發天機勝處必深會輕觴豈虛揮山泉
來何從北望空依依

劉宣

飛翼亭

朝挹東山雲暮看西山雨孤亭在中央相對如賓主矯
矯臥龍蟠軒軒飛鳳舞樹影各參差嵐光互吞吐吁嗟
吳越亡於今已千古不悟拭目忠詎知嘗膽苦登臨撫
陳迹淒涼與誰語白鳥煙中來長歌下山去

胡祇適

題思聖堂

汶上魯中都哲人宰茲邑石刻思聖堂後人知仰德汗
池困飛龍鸞鳳棲枳棘天意人豈知來者三歎息立言
澤萬世貧賤何足惜再拜登故臺歛衽拱而立恍如夢
見之受教開茅塞

王惲

拜奠宣聖林墓

庭訓隋渺茫師授悖嚴誠羗予不惑年行已得夷隘今
歲客東魯似為神所介駕言逐秋風得展闕里拜遙遙
魯甸餘汶水走湍瀨憑軾望雲林鬱鬱佳氣靄齊莊趨
兩楹奠獻成孤酌巋然三聖封仰止高泰岱恨生千年
後今夕備埽灑披雲覩天日太極開一畫彼蒼詎能言

諄諄聖為代三綱與九法範圍無內外君臣以之定乾
坤以之泰東周不可為述作萬世賴藐聆徇鐸音元化
雷雨解敬想燕居容金聲鏘玉佩當時七十子授受儼
如待鳳兮鳴幾時諸子沸秋籟一朱亂紅紫百穀茂稊
稗愚者甘下達誕者樂語怪韞藏寶康瓠幹棄清廟萬
明倫得不泯而有六經在天高孰可階一氣包厚載茲
遊固難言嘿契心有會胷中九雲夢吞納失蒂芥循循
善誘辭師也書諸帶緬懷伯禽業郁郁文獻最三桓張
公室霸功熾而汰一奢去無復荒陵餘石獬煌煌天乙
孫膚敏半冠蓋德博慶自修道大世能邁金石貫元精
泗波來遠派汪濊一聖海不隨梁木壞歸侍金絲堂攝
齊聞磬欬恍如到帝所鈞天廣樂備洗我兩耳聰肉味
忘一噉詠歸寫遺音風雅變鄙邨一簞老東家吾知其
樂大遲遲不忍去寒日下蒼檜

鹿喻

我本麋鹿性出處安自然金鑣非所慕志在長林煙得
遠機穽地食草飲清泉呦鳴錫同類甘以辭華軒野兕
出其側暗蹂山前田農家伺所害乃知獸之愆彼兕以
計去嘉禾歲芊芊野人居山中數畝事墾斲慮為町疇
場指鹿乃兕屬雖無搨刃心見之惡且逐鹿心素無機
淡與標枝閑遁跡入幽谷擇音遠人寰尚為山中人置
疑齒頰間

遊萬固寺

中條鬱蒼蒼首尾固雄大連山一臥虎矯首盡兩戒東
 南萬峪門犖确入幽阨空青上絕壁巖業兩崖對南山
 開畫幃高下蔚萬檜扶藜到山門黃衣六七輩寺殘薄
 水賞一水良可愛尋源入雲蘿不惜阮屐敗掬飲清臆
 塵坐睨巨石怪山空響佩環林迴騰怒獬行聽溪聲回
 周覽詢勝槩當年爽心亭萬竹爭映帶碧鮮照清泚襟
 袂濯沆瀣人境兩渺茫佳句儘誇邁舊有石刻坡詩云水自竹
 根流出風從松頂飄來座
上儘為佳士更
 無一點塵埃開軒邀客飯放目欣一快盤餐固踈糲泉冽
 幾肉啜俄焉林風振萬壑一氣噫前林疑虎嘯作勇助
 吾僊筆落還自驚一掃眾峰靨寺僧請書殿
 閣名故云山僧喜醉顛

海會得珠貝興來本無心遊藏詫佛界夕陽送歸鞍依
 約虎谿外風煙作破墨塔廟失所在鍾美厭摹寫闕伏
 化機藹盤空乏硬語技癢苦無賴馬首詩遽成一笑豁
 吾隘

汾水道中

蒼巔互出縮峪勢曲走蛇回眺驚後擁迎看復橫遮雲
 林蕩高秋半嶺翻晴霞十里九渡水清流帶寒沙山溪
 本幽寂激之聲乃譁解鞍憩美蔭覺我心靜嘉風枝滿
 秋實野菊被水涯幽馨散蘭馥紅鮮綴丹砂二物固瑣
 碎託興騷人誇我欣記所見信筆書田家

過鹿臺山

在澤州沁水縣南二十里
 時被安西王命伐石於此

遠尋文石崗來歷南山纏鹿臺臺爲山幽徑蟠古篆後
峪行未盡前嶺已當面秋聲蕩林樾風露淒以泣陰壑
氣翳鬱疑有虎豹變山田苦無多溝崦耕已徧柴援結
半空羅絡碧巖轉自憐終歲勤獸患防一旦我本山中
人束帶對郵掾頓然還舊觀瀟灑償夙願行經雙蟾嶺
石怪驚變現闖首榭樹間氣自太古練月中誰推墜囚
鎖屬山縣乃知北平守認虎飲羽箭物肖本偶然長歌
下層巘

苦熱歎四十六韻

效昌
黎體

祝融駕火蚪頓轡周八裔戰酣西北乾回薄餘暮熾朱
光沸虞淵大地蒸一氣蒼茫夜色溼醜鬱元象醉今年

六月中荼毒逾往歲金晶才始伏燹怒勢此銳炎官張
火傘屏翳揚赤幟四合歆陳來一鼓赫離治天潢影半
涸星鳥芒欲彗吟風樹葉噤塌翻林鳥墜併兼坎兌權
不使天地閉王城十萬家薰灼迫一勢乾坤隋熾甕逸
德駭天吏掩關人事絕藏伏敢口議褰裳起中夜通夕
不容寐捫背赭汗流窺井湯泉沸松間有困鶴無夢到
清喉牆根有腐草螢化光哲哲穿簾入我室照眼驚火
齊陰蟾遁老魄火鼠騁黠智夜深過我前跳躑翻飲器
屋古又足蝎伺螫尤謹避簟紋燎炎輝側脅能少憩舉
動體慥熟歔歔氣短細抱水眠或可揮翳何所濟二年
客京師身幸置散地雖無束帶勞唯老覺加倍彷徨不

徐邊元言 卷三
知曙種髮沐而被四序本平分偏盛誰所致火攻出下
策不已燔萬類嗟此一世入喝死將何厲此生匪金石
流鑠吁可畏內熱復自焚衰槁將立至燥惟以靜勝事
須以義制冰山詎可依煬竈非所媚遐想崑陵巔庭觀
何偉麗巍然五千仞日月光隱蔽回環十二樓空明淡
無際水晶作柱礎羣玉絢軒陛天風掠枕席月露溼環
帔瑤臺擁灑靈萬舞發清吹真仙事朝元鸞鳳互驂翳
閨風接元圃追陪憶遊戲何年隋塵緣坐想無由詣安
得萬里風振此垂天翅脫落區中囚高舉尋吾契

出香奇石

張生貯奇石携來有遐觀一峰華不注隨我几案間穿

穴作怪供突兀橫蒼顏炷香煙滿竇野燒生春山我久
汨俗冗對之心暫閒暝坐清興遠夢與孤雲還

雙廟懷古

鐵輦動地來獵火燼九縣睢陽東南衝江淮國所援蔽
遮不使前恢復可立見二公明此機死守誓不變雖危
所保大如蝮螫解腕最難結衆心存歿匪石轉彼蒼界
全節誰爲落賊便已矣君不忘握爪掌爲穿竟能濟中
興淮海了清奠至今忠烈氣皎皎白日貫賀蘭觀成敗
不飲浮屠箭殺亡計多寡此論誠可辨我來拜遺像凜
對如生面乞靈激懦衷剴決剛同鍊朔風吹樹聲尚想
登陴戰暮倚暈月城悲歌淚如霰

登舟江船二詠

蓬
尺箒編黃蘆節密數須隻長短隨所宜張弛易為摘者長

二十九節
廣二丈餘一傍繫脚索若網網總緝北人布為帆南俗蓬

以荻舟師貪重載高挂借風力順流與遡波巨鷁添羽

翮望從遠浦來一片雲影黑亂衝渚煙開重帶江雨溼

百里不終朝用舍從順適夕陽見晚泊堆疊紛襞積水

雖物善利其助乃爾益

櫓

江船一鉅魚櫓施乃尾驢當其淵水深棹弱不救乏故

令施航後前與棹力合濟川具有五此物乃其甲一聲

天際來欸乃中流發或浮大河東並岸行若狎終朝卧

舷間蘭槳但空插緬懷剡木皇智創萬古法

覓風字歛硯詩贈侍其府尹

硯本發墨具不爾安用他碧紫暈鸚眼黝黑深宮鴉彼

端類高人風姿固云佳遠韻不少吝清談浩無涯但於

當機時未免思棼拏若或砥礪用茫然手空叉硬則墨

為褪軟則磨泥沙惟歛士之傑體性何交加羅紋與刷

絲一寸皆可嘉回視端溪公有名實則差新安山水窟

澤大生龍蛇舉世被其利何有蛭與鼃山高溪水清其

芒例如破嘗聞右軍硯風字琢手奢是名為水箕朶頤

駭哈呀松煤燼無餘惟恐中書了池寬水瀰漫挹彼如

尊洼陂陀浸半海揮灑生雲霞平生未嘗有夢寐江之
涯君今去爲邦過此空成嗟包公尹端州歸不一硯挈
羸肝類安邑一笑春生華書生乞索態殆是心貪邪禰
衡溺所愛竟慘漁陽搨今冬與來春會有泛斗槎雄雩
或雌縵分送張華家

王旭

遊山林寺

石徑俯雲壑竹林開幽境寺古僧徒稀山深嵐氣冷待
遊未終興紅日忽倒影曳杖披暝煙長歌下前嶺

宋渤

橫溪書院

公餘兩方歇策馬城北郭柳侯讀書處魚鳥尚欣躍鑿
池引泉流種樹滿山脚窮堂峙碧阜風露棲軒箔湘南
富奇峰湘山互經絡斯文自元氣萬古猶如昨相從二
三子暫解塵纓縛廓我仁智心飽此山水樂

丙戌冬至衡陽食柑

衡陽冬猶溫長至似春日朝盤富筍蔬夜砌響蟋蟀白
酒如玉膏黃柑飽霜實更闌袂衣坐燈火不欲即三年
江之南光景去如失匆匆節序時無歲寧家室宗祏香
火寒牢醴誰致潔三雛隔兩地不得遂顧恤勞生分有
數敢但念安逸不虞與求全世或不可必官事未易了
應止筋力率漳東二頃田亦粗給秔秣

衡陽村院得杖材寄徐容齋

放舟清湘波繫舟湘水曲落日紅露生蔽映兩崖綠衲
衣何處僧揖客看修竹攀緣入幽深松桂薦芬馥輕颺
振裳衣餘韻久回復亭亭小梅花却立野人屋蕭然方
出林碧玉萬竿矗敢攀籜龍新請乞老枝感詩翁澹古
思與汝交不瀆往登讀書堂清修配佳菊

程鉅夫

至洪王肯堂治書見示芙蓉詩次韻

春風歇桃李秋雨深莓苔蕭然公館間得此奇種栽九
天清露零一道紅雲開句牽綠衣隊酣宴瑤池杯穠妝
月鑑懸麗服霜刀裁瑞蓮湧平地妙色分五臺暫陪飛

仙遊偏稱幽人懷終疑閨苑去嘉會何時諧此日眼雙
明臨風首低回長當歌楚騷招得花神來

家園見梅有懷疇昔同僚諸君子因成廿六韻

奉寄徐容齋王肯堂諸公

往時姑射仙夜隋江南村江南富嘉植梅花衆中尊九
地闕元凝先天占春暄的皪冰雪姿不受風塵昏孤清
愜幽意賸馥醒吟魂愛之玩不斲冥契終無言羅浮本
幻境前夢覺已謖蹇蹄滯京華倦翼棲淮垣後先青雲
士表裏白玉溫我形自覺穢交道久愈敦貞節保松栢
芳心共蘭蓀信知歲寒友何異連枝昆獨賢天所矜家
山問雞豚歸來適仲冬平旦窺荒園依依故人面竟日

對傾樽清池疎葢影淡月新梢痕冷然絕埃壒恍若遊
崑崙忽憶如花人高談霏露繁眼中不可見思燾風翩
翻頗慚標致似遠近殊託根洪鈞轉嚴令青皇畀新恩
坐看佳實長適口塞衆喧徧遺實中仁生意彌乾坤平
生識賞心皎潔明朝暎凌寒折一枝殷勤寄王孫又恐
遠莫致作詩當重論

次韻肯堂學士冬日紅梨花

黃菊臥階雨六花舞天風壁凍室生白手僵肉作紅秀
句忽隋前光怪侵簾櫳至人宴坐處元氣含沖融無情
及枯株嫣然爲修容坐令玉華君來從蕊珠宮麗妝凝
祥雲明眸轉驚鴻豈非散花手試君情所鍾老我嗜好

淡空詩亦雷同祇願酌花時毋忘比鄰翁

次韻盧疎齋就以贈別二首

百川晝夜流萬折不能止羣山勢崩奔終古乃在此人
生費推輓三歎中夜起瀟湘有佳人朗月鑑秋水思之
不可見曠若隔千祀相逢在歲晏使我寢食美又言當
遠別東去數千里何由小躊躇招招彼舟子
芥拾琥珀針不言自相得留君我無辭送君我無力願
君加餐飯努力崇明德江空餘深寒出入慎扶翼梅花
照清潁夢寐耿玉色矯首東南雲金門幸回憶

和陶詩

秋風吹庭樹密葉潛銷落元燕寧久翔白雁紛南泊清

晨得尊酒冥然還獨酌年運倏徂謝春秋焉能託依依
仰先哲緬邈空述作江漢日東流寒花繞叢薄開卷撫
休運振衣望丘壑
荷蓑非避世持竿不求賞夙抱江海心寧爲利名鞅天
明紫煙裏日暮清波上四顧無人知孤舟自來往

長橋漲晴波南山滴空翠清風孝侯祠六月薄炎熾蒼
然擁喬木廊宇深以邃升堂拜遺像凜凜增壯氣緬懷
絕塵姿跣屣幾自棄一念狂聖分千秋仰高義義興阻

湖山從古勞撫治况當離亂後生理多不遂連州虎爲
害接浦蛟作祟故國神所遊陰相得無意我來按茲郡
強禦寧汝畏恐被蛟虎徒匿形知暫避不埋張網輪徒
攬范滂轡澄清悵何時留詩志予媿

苟宗道

題申伯福遊山圖

聖賢初用心出處固不苟胡爲慕萬鍾胡爲棄升斗鴟
鷄兩逍遙夷惠各有取丈夫遇明時立志期不朽中有
幸不幸竊位徒可醜申君閎閎子繪作山林叟推却簿
書叢便與麋鹿友不醉河陽花擬種彭澤柳堂堂胡紫
山毅然爲倡首於今宰杞城欲去尚掣肘未得遂吾初

慎勿廢官守安知遊山人不是調元手
 書畫元淮 水竹軒乃予退居之所政與熙春樵嵐相鄰朝
 暮之間雲煙變態四時之景氣象萬千其畫工
 吟筆之所不能盡者皆致吾書窗几席之間因
 賦樵嵐閑居水竹軒土字韻邀好事者和之
 水鏡得閑居脩竹映軒廡樵嵐城市外迴有山林趣幽
 窗宜習靜孤坐忘百慮風枝正韻秋寒葉更飛雨茲來
 息奔走即此成燕處道勝物自輕權勢皆糞土
 容膝坐小軒野興厭廊廡潺潺水竹幽寓此得佳趣憂
 道輕黃金身外何足慮水鏡瑩無塵竹圃自煙雨幽棲

雖寡徒筆硯可同處更喜芋區旁尚有種瓜土

方回

秋晚雜書

昔聞有烈士哀歌缺唾壺衰暮心不已狗名殆忘軀我
 老詎復爾一壑不願餘外物百無嗜惟喜讀我書空樽
 已絕瀝寒庖僅微蔬兒啼得非餒塵編聊自娛敝廬匪
 無山猶茲寄城隅車馬不至處願言遷林居

賦詩學淵明詩故未易及飲酒慕淵明酒復罕所得荒
 涼數畝園卜築未成宅此或類陶家秋菊亦可摘古稱
 士希賢將無肖厥德如我於柴桑往往似其迹儲粟既
 以瓶子尤不勝責有時醉欲吟空集索逋客

堂堂陳去非中興以詩鳴呂曾兩從橐殘月配長庚尤
蕭范陸楊復振乾淳聲爾後頓寂寥草蟲何薨薨永嘉
有四靈詞工格乃平上饒有二泉旨淡骨獨清學子孰
取舍吾非私重輕極元雖有集豈得如淵明
吾家一何奇奇峰照南窗是爲紫陽山萬木青縱縱上
有出岫雲下有見底江江清雲無心伴此眉宇龐詩思
忽飛來時有白鳥雙落日澹秋水寒溝度枯杠歸歟書
屋夜昏燈剔幽缸懷人良未遠遜翁生是邦

秀亭秋懷

一室局戶牖古籍勤討刪鬱鬱忽不樂扶杖登東山莽
蒼何所極秋色天地間我欲出塵世黃鵠無由攀憂端

從空來律砒未易宣意闊步武窄四顧盡險艱不如復
我所陶此靈府閑

老懷幸無事何用知秋風團團烏柏樹一葉垂殷紅爲
此有所感長吟敲虛空城市了在目心隔雲萬重燕席
鼓吹急游騎呵殿雄亦各適爾適擾擾塵堞中焉知天
地外有此頽然翁

八月十五日二十日兩至南山飲瀟灑亭

悠悠桐江水寓廬十二年重來六日內兩日登南山南
山有何好高閣西北偏隔江三千家一抹煙靄間閣檻
一巨松挺出衆木前野性所酷愛老藤相糾纏亦如我
與僧相對談幽禪稍遂物外性屢寫酣中篇故侯復齊

民鬚髮成華顛念當舍此去焉得長周旋
初三日水長二丈早行

夜聞舟人呼江水溢二丈岸薪隨波流救者何擾攘亥
子十月交地氣不當上十日柱礎汗蠅蚊闕帷幌此時
肯爲雪豈不兆豐穰積熱化滂沱傾空瀉盆盎前夕適
醉卧不省船背響濤聲撼醒枕於茲發孤想炎方節侯
乖病叟體膚癢遑遑欲何之曷日中園仰星斗猶粲然
曉征發雙槳起視所泊處餘燈煜莽蒼

送劉都事五十韻

晦叔密齋

近人於仕宦如以韓盧獵泰山有不見得獸誇足捷學
問夫何如有書鑰諸篋府史以爲師僅能署吏牒雕鞍

驟肥馬畫閣貯美妾萬一至公相豈堪任調燮老友劉
密翁早隸周孔業大輅鸞和鳴大樂律呂協南省據都
曹不以貴自挾朋來多下交賓至必謙接解官寓城東
座寒乏氈氈高臥懶問遺兩落秋萸莢積薪後居上彼
勇哂吾怯爲言恥孟晉如病夏畦脅有時酤我飲荒野
縱步屨果核飮俎豆羹糝供七筴居然道懷孚宜爾情
話接公才豈不知大川宜作楫顧於名利波未肯卜利
涉人生惑外物種種意欲愜高睨官爵梯等級恨不躡
愚竊窺此翁嗜欲穿已斂寧爲三省魯不慕一諾俠經
史入胷中丘陵堆重疊文詞落筆下布泉極熨帖莊重
異新銳詳緩葢虛聾誰歟心怏怏或者言喋喋氣帥直

其內義理爲管攝歸歟埽松楸試負都門笈中書多缺
負聞早下堂帖不然肅政臺冠豸羣小懼分司江之南
亦足煦疲劣去當柳嘶蜚還及杏飛蝶鯁生嶺海夢尚
憶鳶跼跼短隨李廣衣長彈馮驩鋏萬死脫一生麤免
翳桑輒今年七十老鬚禿無可鑷與人素寡合况又畏
訟諛往往交游間平地生截葉萬里風枝殊一旦合鷓
鴒揮塵許諳聽曳履容追躡公將北闕覲我終南畝
甚欲餞遠郊扶杖尾蹠躓愧無一杯酒陽關唱紅頰他
人侈別筵椎牛宰剛鬣而此何枵然窮極碁無劫顧視
童子佩悅礪若觴鰈持干富人肆詎肯出質貼吟茲送
行篇終夜不交睫浩浩號西風索索雨木葉

御選元詩卷第十二

其內義理... 其間早... 亦足... 憶... 新... 款... 輝... 甚... 嗚... 重... 行...



